

DS  
735  
A2Y86  
1771a  
v. 45

University of Toronto  
Library

c 400/62

ASIAN COLLECTION





御批歷代通鑑輯覽卷之八十九

宋

光宗皇帝

戊辰

紹熙元年

金章宗璟  
明昌元年

春正月丙辰朔帝朝壽皇于重華

宮

金以完顏守貞

本名左驤  
固新之孫為叅知政事

金主新即政銳意于治嘗問漢宣帝綜核名實之道其

施行之實果何如守貞誦樞機周密品式詳備以對上

曰行之果何始守貞曰在陛下勵精無倦耳

久之進守  
貞尚書左

丞出知東平府明昌  
四年召拜平章事

二月殿中侍御史劉光祖

字德修簡  
州陽安人

乞禁譏議道學者



光祖初登第。廷對切直。淳熙五年召對。論恢復事。請以  
太祖用人爲法。及帝卽位。殿中侍御史闕。上方嚴其選。  
謂宰臣留正曰。卿監郎官中有其人。正沈思久之。曰。得  
非劉光祖乎。帝曰。是久在朕心矣。光祖入對。卽上疏極  
論近世譏貶道學之非。畧謂。是非不明。則邪正互攻。公  
論不立。則私情交起。此固道之  
消長。時之否泰。而實爲國家之禍福。社稷之存亡。甚可  
畏也。本朝上大夫學術。最爲近古。初非有強國之術。而  
國勢尊安。根本深厚。咸平景德之間。道臻皇極。治保太  
和。至于慶歷嘉祐盛矣。不幸而壞于豐熙之邪說。疎棄  
正士。招徠小人。幸而元祐君子起而救之。未流大分。事  
故反覆。紹聖元符之際。羣兇得志。絕滅綱常。其論旣勝。  
其勢旣成。崇觀而下。尚復何言。臣始至時。聞有譏貶道  
學之說。而實未親朋黨之分。逮臣復來。則朋黨已成。而  
忠諫者獲罪矣。夫以忠諫爲罪。其去紹聖幾何。陛下卽  
位之初。凡所進退。率用人言。初無好惡之私。豈以黨偏  
爲主。而一歲之內。逐者紛紛。往往納忠之言。謂爲沽名  
之舉。至于潔身以退。亦曰憤懣而然。欲激怒于至尊。必



加之以謗訕。臣欲熄將來之禍。故不憚反覆以陳。伏冀聖心豁然。永為皇極之主。使是非由此而定。邪正由此而別。公論由此而明。私意由此而熄。道學之譏。由此而消。朋黨之跡。由此而滅。和平之福。由此而集。國家之幸。由此而理。則生靈之幸。社稷之福也。不然。相激相勝。展轉反覆。為禍無窮。臣實未知稅駕之所。帝下其章。讀者至于流涕。是年廷試舉人。進士王介。

字元石。婺州金華人。

策亦言。今之所謂道學者。即世之君子正士也。君子正

士之名不可逐。故設為此名。一網去之。聖明在上。而天

下以道學為諱。將何以立國哉。帝嘉歎。擢為第三。由是

道學之譏少沮。

光祖尋以帝用潛邸巫醫吳端為閣門宣贊舍人。疏論忤旨。出為潼川府判官。

潼川府重和

初置。注見前。

三月。金初設制舉及宏詞科。

舉無常期。上意欲行。則特詔天下。二科皆以待非常之



士也。

夏四月以伯圭

秀王子偁長子壽皇母兄

嗣秀王。

詔卽湖州秀園立廟奉神主建祠臨安府以藏神御如濮王故事而以伯圭嗣王伯圭謙謹不以近屬自居每入見帝行家人禮宴私隆洽伯圭執臣禮愈恭。

秋七月以留正爲左丞相王藺爲樞密使葛邲叅知政事胡晉臣簽書樞密院事。

藺在政府不存形迹除目或自中出未愜人心者藺輒留納之時方議建皇后家廟藺力爭以爲不可未幾中丞何澹論之遂罷帝以葛邲知樞密而以晉臣代邲。

辛卯二年

金明昌二年

春二月詔羣臣各言時政闕失。



時以雷雪交作。故有是命。吏部侍郎陳騭

字叔進。台州臨海人。疏

三十條。如官闈之分不嚴。則權柄移。內謁之漸不杜。則

明斷息。宴飲不時。則精神昏。賜予無節。則財用竭。尤切

時病。

按騭此疏。續綱目誤繫于明年。騭知樞密之時。今據騭本傳改輯。

尋詔以米五萬

石賑京城。權罷修皇后家廟。

秋七月。金以圖克坦鑑

本名安春。上京路明安人。按安春舊作按出。今改。後仿此。爲尚

書右丞。

鑑該習經史。以材能稱。而有執守。時金主銳意治平。鑑

上言。陛下撫太平之基。宜稽古崇德。無因物以爲好惡。

喜怒。無以好惡喜怒。輕忽小善。不恤人言。唐陸贄嘗陳

隔塞之九弊。上有其六。下有其三。陛下能慎其六。爲臣



者敢不愼其三哉。上下之情通。則大綱舉而羣目張矣。

金主嘉之。

未幾罷爲定武軍節度使。知平陽府事。

冬十一月。帝有事于太廟。皇后殺貴妃黃氏。翼日郊。大風雨。不卒事而還。帝有疾。

初。帝欲誅宦者。近習懼。遂謀離間三宮。帝疑之。會帝得心疾。壽皇購得良藥。欲因帝至宮授之。宦者遂訴于皇后曰。太上合藥一大丸。俟宮車過。卽授藥。萬一不虞。奈宗社何。后覘藥實有心銜之頃之內宴。后請立嘉王擴爲太子。壽皇不許。后退持嘉王泣訴于帝。謂壽皇有廢立意。帝惑之。遂不朝壽皇。后以黃貴妃有寵。因帝祭太廟宿齋宮。后殺貴妃。以暴卒聞。翼日合祭天地。風雨大。



光宗政事多決于后視唐高宗令后決百司奏事何異至斷臂擅殺之慘亦復相同然李后之毒悍實皆光宗闇懦不振有以釀成之而不朝壽皇失子道其罪更浮于高宗矣

作黃壇燭盡滅不能成禮而罷帝既聞貴妃卒又值此變震懼增疾不視朝政事多決于后后益驕恣壽皇聞帝疾亟往南內視之且責后后怨愈深

壬子

三年金明昌三年春三月帝疾瘳羣臣請朝重華宮不果行

帝自有疾重華溫清之禮以及誕辰節序屢以壽皇傳旨而免既而帝神思寢清宰輔百官下至韋布之士以過宮爲請者甚衆至有叩頭引裾號泣而諫者帝開悟有翻然夙駕之意既而不果行都人始以爲憂

夏四月帝朝重華宮

以邱密爲四川制置使

初留正帥蜀慮吳氏世將謀去之不果至是議更蜀帥



正言西邊三將。惟吳氏世襲兵柄。號為吳家軍。不知有朝廷。遂以戶部侍郎邱密往。密陛辭。奏曰。臣入蜀後。吳挺字仲烈。璘之子。脫至死亡。兵權不可復付其子。臣請得以便宜撫定諸軍。許之。

六月。以陳騭同知樞密院事。

冬。十一月。日南至。越六日。帝始朝重華宮。

日南至。丞相留正。率百官詣重華宮稱慶。兵部尚書羅

點。

字春伯。撫州崇仁人。

給事中尤袤。中書舍人黃裳。

字文叔。隆慶府普城人。

御史黃度。

字文叔。紹興新昌人。

尚書左選郎官葉適等上疏請帝

朝重華宮。不從。秘書郎彭龜年。

字子壽。臨江軍清江人。

以書譙吏

部尚書趙汝愚。且上疏極諫。

署謂壽皇之事。高宗備極子道。此陛下所當觀也。况



壽皇今日止有陛下一人。聖心拳拳不言可知。特遇過宮日分陛下或遲其行。則壽皇不容不降免到宮之旨。蓋爲陛下辭責于人。使人不得以竊議陛下。其心非不願陛下之來。自古人君處骨肉之間。多不與外臣謀。而與小人謀之。所以交鬭日深。疑隙日大。今日兩宮萬萬無此。然臣所憂者。外無韓琦富弼呂誨司馬光之臣。而小人之中。已有任守忠者在焉。惟陛下裁察。又言使陛下虧過宮定省之禮。皆左右小人間謀之罪。幸執侍從。但能推父子之愛。調停重華。臺諫豈能仗父子之義。責望人主。至于疑問之根。盤固不去。曾無一語及之。今內侍間謀兩宮者。固非一人。獨陳源在壽皇朝。得罪至重。近復進用。外人皆謂離間之機。必自源始。宜亟發威斷。首逐陳源。然後肅命鑾輿。負罪引慝。以謝壽皇。使父子歡然。宗社有賴。顧不幸歟。汝愚入對。往復規諫。帝意乃悟。汝愚又屬嗣秀王伯圭調護。于是兩宮之情始通。辛卯。帝朝重華宮。皇后繼至。從容竟日而還。都人大悅。

### 后歸謁家廟



推恩親屬及使臣鄧從訓等幾二百人。

知荆門軍陸九淵

字子靜。撫州金谿人。卒。

九淵少聞靖康間事。慨然有感于復讎之義。訪智勇士。議恢復大畧。乾道中。以薦除勅令所刪定官。因輪對。陳五論。一論仇恥未復。願博求天下之俊傑。二論願致尊德樂道之誠。三論知人之難。四論事當馴致而不可驟。五論人主不當親細事。未幾。以主管台州崇道觀還鄉。及帝卽位。差知荆門軍。民有訴者。無早暮皆得造于庭。多所勸釋。嚴保伍之法。盜賊屏息。荆門爲次邊而無城。九淵以爲郡居江漢之間。荆門固則四鄰有所恃。乃請于朝而城之。逾年。政行令修。民俗爲變。一日謂僚屬曰。



光宗自三年春疾瘳以迄五年春正月朝于壽皇及從幸者僅七見追壽皇不豫以後問疾視藥之事終于闕如其過已無可解免續綱目于四年春正月訖三月兩朝皆削而不載夫二年七朝不可不謂之定省久曠據史直書其失自

某將告終會禱雪明日雪乃沐浴更衣端坐後二日卒。

九淵兄九齡九韶皆學行淵粹為學務窮原本不為章句訓詁嘗與朱熹會鵝湖論辨多不合及熹守南康九淵訪之熹與至白鹿洞九淵為講君子小人喻義利一章聽者至為泣下熹以為切中學者隱微深痼之病九齡字子壽九韶字子美鵝湖山名山有寺為朱熹與九淵兄弟會講之所今為鵝湖書院在江西廣信府鉛山縣北白鹿洞注見前。

是歲諸路大水。

癸丑四年。金明昌四年。春正月己巳朔帝朝重華宮。

三月帝朝重華宮皇后從。

以葛邲為右丞相陳騭參知政事胡晉臣知樞密院事趙汝愚同知院事。

御史汪義端與汝愚有隙上言高宗聖訓不用宗室為



見即增此兩朝豈遂足以末減光宗之罪哉因備錄之

嘗論孟子文囿芻蕘雉兔之往久之并芻蕘雉兔之地亦不可得所謂盡信書不如無書也章宗乃以圍獵之地悉與民耕則講武且因之而廢觀章宗論察吏教民之道未嘗不知治要顧核其平日所措施乃偏以典章文物為急未免近于好名而于詰戎肄武之道棄之如遺遂盡變金源舊風國勢日就孱弱大定之業衰矣說者咸以章宗為守成令主然子孫不能承祖父基緒致家法因之而墮雖有善政亦奚足

金弛禁地許民耕種。

宰執汝愚楚王元佐七世孫不宜用之。汝愚亦力辭。不許。命當制學士申論上意。而黜義端。汝愚乃拜命。

金主諭點檢司行宮外地及圍獵之處悉與民耕。

金主嘗謂

近臣曰。凡稱政有異蹟者謂其斷事有軼才也。若止清廉此乃本分。以貪污者多故顯其異耳。又謂近言事者以方今孝弟廉恥道缺。乞正風俗。此蓋官吏不能奉宣教化使然。今之察舉官吏者多責近效。以幹辦為心。其有秉心寬厚欲行德化者輒謂之迂濶。故人人皆以教化為餘事。此孝弟所以廢也。今之所察舉皆先才而後德。巧猾之徒雖有贓污一旦見用猶為能吏。此廉恥所以喪也。又東京路副使王勝進鷹金主遣諭之曰。汝職非輕。民間利害官吏邪正畧不具聞。而乃以鷹進。此豈汝所職也。後母復爾。是年夏百官屢表請上尊號。金主曰。比年五穀不登百姓流離正當戒懼修省之日。豈得虛受榮名耶。不許。仍斷來章。

金以胥持國

字秉鈞代州繁時人參知政事。



持國以中經童科入仕。爲太子祇應司令。金主在東宮

識之。及卽位。遂大用。持國爲人柔佞。有智術。時昭容李

氏得幸。

李氏名師兒。父湘。其家以罪沒入宮籍。監金主納之。金主好文詞。李氏慧黠。能作字。知文義。遂

大愛幸。

持國陰附之。又多遺賂左右。昭容亦自嫌門第寒

薄。欲藉外廷爲重。乃數譽持國。金主愈信任之。表裏擅

政。士之好利躁進者。爭趨其門。四方爲之語曰。經童作

相。監婢爲妃。翰林應奉文字趙秉文。

字周臣。磁州滏陽人。

上書論

之。且薦完顏守貞可大用。金主召問。秉文言頗差異。命

知大興府事內族膏。

音庸。續綱目誤作膏。本名額里埒。金宗室也。元史類編云。避世宗父

宗堯諱。故凡宗字皆改之。按額里埒舊作阿里刺。今改。後仿此。

鞫之。秉文遂引同議者

修撰王庭筠。

字子端。河東人。

御史周昂。

字德卿。真定人。

省令史潘豹。鄭



贊道高坦等五人皆下獄被斥。

明年封昭容為淑妃。復進封元妃。兄喜兒弟鐵

哥皆顯擢。勢傾朝野。監察御史姬端修上書乞遠小人。金主遣李喜兒問端修小人為誰。對曰。小人者李仁惠兄弟。仁惠喜兒賜名也。喜兒以聞。金主稍呵責之。然不能去。及圖克坦鑑入相。一日金主問漢高帝光武孰優。鑑曰。光武在位歲久。無沉湎冒色之事。高祖惑戚姬。卒致亂。由是言之。光武優。金主知其諷諫。默然久之。姬端修字平叔。汝州人。本姓宗。亦以避諱改。

夏五月。賜禮部進士陳亮

字同父。永康人。及第。

亮才氣超邁。善談兵。議論風生。下筆數千言立就。所交

皆一時豪傑。志存經濟。隆興初。上中興五論。不報。嘗環

視錢塘。喟然歎曰。城可灌也。蓋以地。下于西湖爾。淳熙

中。詣闕上書。極言時事。因言錢塘非駐蹕之所。壽皇赫

然震動。欲榜朝堂以勵羣臣。用种放故事。召令上殿。將



深亮所學本出于縱橫家  
其平日爲文卽不能無偏  
駁之病而此對策更出于  
揣摩迎合不自知其可鄙  
夫以光宗子職之愆無可  
掩飾而亮乃謂豈徒一月  
四朝爲京邑美觀稍有八  
心者必不出此操術不端

擢用之。曾覲聞而欲見焉。亮恥之。踰垣而逃。覲不悅。大  
臣亦惡其切直。交沮之。待命十日。再詣闕上書。壽皇欲  
官亮。亮聞而笑曰。吾欲爲社稷開數百年之基。寧用以  
博一官乎。卽渡江歸。益力學著書其學自孟子後惟推  
王通嘗曰研窮義理之精微辨析  
古今之同異。原心于秒忽。較理于分寸。以積累爲上。以  
涵養爲正。辟面盎背。則于諸儒誠有愧焉。至于堂堂之  
陣。正正之旗。風雨雲雷。交發而並至。龍蛇虎豹。變見而  
出沒。推倒一世之智勇。開拓萬古之心胸。自謂差有一  
日之長。蓋指朱至是策進士。問以禮樂刑政之要。亮以  
薰呂祖謙也。君道師道對。且曰。臣竊歎陛下于壽皇涖政一十有八  
年之間。寧有一政一事之不在聖懷。而問安視寢之餘。  
所以察辭而觀色。因此而得彼者。其端甚衆。亦旣得其  
機要。而見之施行矣。豈徒一月四朝爲京邑之美觀也。



雖能文亦奚足重顧倏然  
自負為推智勇拓心胸適  
為有識者所不齒于人類  
耳

哉。帝得其策大喜。以為善處父子之間。御筆擢為第一。

授簽書建康府判官廳公事。未上。一夕卒。

利州安撫使吳挺卒。邱密使總領財賦楊輔字嗣勳。等權

總其軍。

密命總領財賦楊輔權安撫使。統制官李世廣權總其  
軍以殺吳氏之權。

召浙東副總管姜特立還。留正乞罷。相不許。六月。正出城  
待罪。

帝念特立不已。召之。留正引唐憲宗召吐突承璀事乞

罷不報。乃出待罪六和塔。在今錢塘縣西南。臨江北岸。而上疏切諫

于是著作郎沈有開著作佐郎李唐卿秘書郎范黼彭



龜年校書郎王奭正字蔡幼學字行之溫州瑞安人顏械吳獵字德

夫潭州醴陵人項安世字平父其先話蒼人後家江陵等上疏乞寢特立召命

不報正因繳進前後錫賚及告敕乞歸田里亦不許正

出城待罪凡百四十日帝遣左司徐誼字子宜一字宏父溫州人諭

旨乃復入都堂視事復命差特立還浙東

胡晉臣卒

帝自有疾不視朝晉臣與留正同心輔政中外帖然其

所奏陳以溫清定省爲先次及親君子遠小人抑僥倖

消朋黨啟沃剴切彌縫續密人無知者

秋七月以趙汝愚知樞密院事余端禮字處恭衢州龍游人同知院



蜀帥吳挺卒。端禮謂汝愚曰：「吳氏世握蜀兵，若復承襲，將為後患。」汝愚是其言，合辭以奏。帝意未決。及樞密命下，汝愚辭不拜。帝尋以興州都統制張詔代挺領武興軍。汝愚始受命。按：汝愚之辭，續通鑑據光宗紀，係于明年正月。今從本傳。

八月，金主釋奠孔子廟。

北面再拜。

九月，羣臣請帝朝重華宮，不聽。冬十一月，始朝。

帝制于后，久不朝重華宮。會九月重明節，帝生辰也。羣臣連

章請帝過宮，不聽。而召內侍陳源為押班，中書舍人陳

傅良

字君舉，溫州瑞安人。

不草詞，且上疏力諫。給事中謝深甫

字

肅，台州臨海人。景之之子。

言：「父子至親，天理昭然。太上之愛陛下，亦

晨登定省，天性自然，固非作而致之者。至于侍從連章力諫，臺臣慟哭殿庭，即勉強往朝，而本心已不可



問矣乃甫趣駕欲行旋以李后挽留卽止忽而感悟天良忽而漸滅殆盡光宗既非失心狂易之疾何昧于父子之親受制悍后恬不知恥此誠咸丘蒙所云天下殆哉岌岌乎之時矣

猶陛下之愛嘉王。太上春秋高。千秋萬歲。陛下何以見天下。帝感悟。趣命駕往朝。百官班立以俟。帝出至御屏。后挽留帝入。曰。天寒。官家且飲酒。百僚侍衛。相顧莫敢言。傅良趨進。引帝裾請毋入。因至屏後。后叱曰。此何地。秀才欲斫頭耶。傅良痛哭于庭。后益怒。遂傳旨罷還內。于是著作郎沈有開。秘書郎彭龜年。禮部侍郎倪思。字正甫。湖州歸安人。國子錄王介等皆上疏請朝。不從。十月。工部尚書趙彥逾。字德光。等上書重華宮。乞會慶節勿降旨免朝。壽皇曰。朕自秋涼以來。思與皇帝相見。卿等奏疏。已令進御前矣。及會慶節。帝復稱疾不朝。丞相以下皆上疏自劾乞罷黜。嘉王府翊善黃裳請誅內侍楊舜卿。彭龜



年請逐陳源以謝天下。太學生汪安仁等二百一十八人上書請朝重華宮。皆不報。十一月。彥逾等復力陳。帝始往朝。

十二月。夏主仁孝卒。子純佑立。

夏主在位五十五年。始建學校于國中。立小學于禁中。親爲訓導。尊孔子爲文宣帝。然權臣擅國。兵政衰弱。子

純佑立。

改元天慶號。仁孝曰仁宗。

以朱熹知潭州。

使者自金還。言金人問朱先生安在。故有是命。

甲寅

五年。

金明昌五年。

春正月。癸亥朔。帝朝重華宮。癸酉。壽皇不

豫。



葛邲罷。

邲爲相。專守祖宗法度。薦進人才。博采公論。至是罷知

建康。

邲後判紹興府。簡稽期會。錢穀刑獄必親。或謂大臣均佚有體。邲曰。崇大體而簡細務。吾不爲也。

金購求遺書。

凡崇文總目內所闕書籍。悉購之。尋又置弘文院。譯寫經書。

夏四月。帝及后幸玉津園。羣臣請帝問疾重華宮。不從。

壽皇自正月不豫。羣臣請帝省視。皆不報。四月。帝與皇后幸玉津園。兵部尚書羅點請先過重華宮。且曰。陛下爲壽皇子四十餘年。無一間言。止緣初郊違豫。壽皇嘗至南內。督過左右之人。自此讒間遂生。以臣觀之。壽皇



與天下相忘久矣。今大臣同心輔政。百執事奉法循理。宗室戚里。三軍百姓。皆無貳志。設有間離。誅之不疑。乃若深居不出。久虧子道。衆口謗譏。禍患將作。不可以不慮。帝曰。卿等可爲朕調護之。侍講黃裳對曰。父子之親。何俟調護。黜曰。陛下一出。卽當釋然。帝猶未許。黜乃率講官言之。帝曰。朕心未嘗不思壽皇。黜曰。陛下久闕定省。雖有此心。何以自白。起居舍人彭龜年連三疏請對。不報。屬帝視朝。龜年不離班位。伏地叩額。血流漬鬢。帝曰。素知卿忠直。欲何言。龜年奏。今日無大于過宮。余端禮因曰。叩額龍墀。曲致忠懇。臣子至此。豈得已耶。帝曰。知之。然猶不往。壽皇疾益甚。羣臣上疏請者相繼。帝將



以癸丑日朝至期。丞相以下入宮門。俟至日昃。帝復辭以疾。于是羣臣請斥罷者百餘人。詔不許。裳與秘書少監孫逢吉字從之。古州龍泉人。等再上疏以請。起居郎兼中書舍人陳傅良請以親王執政一人充重華宮使。臺諫交章劾內侍陳源、楊舜卿、林億年離間之罪。請逐之。

五月。壽皇疾大漸。詔嘉王擴問疾重華宮。

壽皇欲一見帝。數顧視左右。陳傅良以帝不往重華宮。乃繳上告敕。出城待罪。丞相留正等率宰執進諫。帝拂衣起。正引帝裾泣諫。羅點進曰。壽皇疾勢已危。不及今一見。後悔何及。羣臣隨帝入。至福寧殿。內侍闔門慟哭而出。越二日。正等又請對。帝令知閣門事韓侂胄字節大。琦



會孫傳旨云宰執並出正等俱出浙江亭

即樟亭在今仁和县南錢塘江

北待罪壽皇聞之憂甚佞胄奏曰昨傳旨令宰執出殿

門今乃出都門請自往宣押入城于是正汝愚等復還

第明日帝召羅點入對點言前日迫切獻忠舉措失禮

陛下赦而不誅然引裾亦故事也帝曰引裾可也何得

輒入宮禁乎點引辛毗事以謝且言壽皇止有一子既

付神器惟恐見之不速耳從官及彭龜年黃裳沈有開

奏乞令嘉王詣重華宮問疾許之王至宮壽皇爲之感

動

六月壽皇崩帝稱疾不出留正等請壽聖皇太后代行喪

禮

問疾視藥子在而以孫代之已乖理之正然非諸臣再三固請聖王亦不遣矣壽皇是時疾且大漸況數顧左右欲一見帝爲人子者尚何忍高處深宮漠然不顧是光宗之受制也



晨不惟有虧子職。真乃全失人心矣。

壽皇崩。是夕。重華宮內侍訃于宰執私第。趙汝愚恐帝疑惑。不出視朝。持其劄不上。次日帝視朝。汝愚以聞。因請詣重華宮成禮。帝許之。至日晨。不出。宰相乃率百官發喪。將成服。留正與汝愚議。請壽聖太后暫主喪事。太后不許。正等附奏云。臣等連日造南內。請對不獲。累上疏不得報。今當率百官恭請。若皇帝不出。百官相與慟哭于宮門。恐人情騷動。爲社稷憂。乞太后降旨。以皇帝爲有疾。暫就宮中成服。然喪不可以無主。祝文稱孝子嗣皇帝。宰臣不敢代行。太后壽皇之母也。請攝行祭禮。太后許之。

尊壽聖皇太后爲太皇太后。壽成皇后爲皇太后。



光宗于壽皇生不能視疾  
歿不能執喪孝道虧而天  
理絕實無辭以謝天下留  
正身為宰輔不請其力疾  
臨次以盡禮而請其早正  
儲位以釋謗已昧于重輕  
先後之權衡乃見御劄念  
欲退閒之語遽爾大懼佯  
仆請老止圖獨善其身而  
置國事如末務大臣進退  
之節若此亦奚足稱史冊  
尚過為優乎豈復知大義  
耶

秋七月留正請建皇太子不許遂稱疾而遁

葉適言于留正曰帝疾而不執喪將何辭以謝天下今  
嘉王長若預建參決則疑謗釋矣正從之率宰執入奏  
云皇子嘉王仁孝夙成宜早正儲位以安人心不報越  
六日又請御批云甚好明日宰執同擬旨以進乞帝親  
批付學士院降詔是夕御劄付丞相云歷事歲久念欲  
退閒正得之大懼因朝佯仆于庭即出國門上表請老  
且云願陛下速回淵鑒追悟前非漸收人心庶保國祚  
初正始議帝以疾未克主喪宜立皇太子監國若未倦  
勤當復明辟設議內禪太子可即位而趙汝愚請以太  
皇太后旨禪位嘉王正謂建儲詔未下遽及此他日必

難處與汝愚異。遂以肩輿五鼓逃去。

太皇太后詔嘉王擴成服卽位。

是爲寧宗。

尊帝爲太上皇帝。

留正既去。人心益搖。會帝臨朝。忽仆于地。趙汝愚憂危不知所出。內禪之議益決。屬工部尚書趙彥逾結殿帥郭杲而與左選郎官葉適。左司郎中徐誼謀可以白內禪之意于太皇太后者。乃遣知閣門事韓侂冑。侂冑太后女弟之子也。侂冑因所善內侍張宗尹以奏太后。不獲命。明日往。又不獲命。遂巡將退。內侍關禮見而問之。侂冑具述汝愚意。禮令少俟。入見太后而泣。太后問故。禮對曰。聖人讀書萬卷。亦嘗見有如此時而保無亂者乎。太后曰。此非汝所知也。禮曰。此事人人知之。今丞相



已出所賴者。趙知院旦夕亦去矣。言與淚俱下。太后驚曰。知院同姓。事體與他人異。乃亦去乎。禮曰。知院未去。非但以同姓故。以太皇太后爲可恃耳。今定大計而不獲命。勢不得不去。去將如天下何。願聖人三思。太后問侂冑安在。禮曰。臣已留其俟命。太后曰。事順則可。令諭好爲之。禮報侂冑。且曰。來早太后于壽皇梓宮前垂簾引見執政。侂冑復命。日已向夕。汝愚始以其事語陳騭。余端禮。亟命殿帥郭杲等。夜以兵分衛南北內。關禮使傳昌朝密製黃袍。是日嘉王謁告。不入。臨時將禪祭。汝愚曰。禪祭重事。王不可不出。翼日甲子。羣臣入。王亦入。汝愚率百官詣梓宮前。太后垂簾。汝愚率同列再拜奏。

皇帝疾未能執喪。臣等乞立皇子嘉王爲太子。以係人心。皇帝批出有甚好二字。繼有念欲退閒之旨。取太皇太后處分。太后曰。既有御筆。相公當奉行。汝愚曰。茲事重大。播之天下。書之史冊。須議一指揮。太后允諾。汝愚袖出所擬太后指揮以進。云皇帝以疾。至今未能執喪。曾有御筆。欲自退閒。皇子嘉王擴。可卽皇帝位。尊皇帝爲太上皇帝。皇后爲太上皇后。太后覽畢曰。甚善。汝愚奏。自今臣等有合奏事。當取嗣君處分。然恐兩宮父子之間。有難處者。須煩太后主張。太后乃命汝愚以旨諭皇子卽位。皇子固辭曰。恐負不孝名。汝愚奏。天子當以安社稷。定國家爲孝。今中外人人憂亂。萬一變生。置太



上皇何地。衆扶皇子入素幄。被黃袍。方却立未坐。汝愚率同列再拜。皇子詣几筵。奠哭盡哀。須臾立仗訖。催百官班。皇子衰服出就重華殿東廡。素幄立。內侍扶掖乃坐。百官起居訖。行禪祭禮。尋詔卽以寢殿爲泰安宮。以奉。上皇。民心悅懌。中外晏然。汝愚之力也。

立皇后韓氏。

后琦六世孫。父同卿。侂冑同卿之季父也。續綱目以爲后之季父。誤。

后被選入宮。能順適兩宮意。遂歸嘉王邸。至是立爲后。大赦。

復召留正赴都堂視事。以趙汝愚兼權叅知政事。

正旣去。及帝卽位。以爲大行攢宮總護使。入謝。復出城。太皇太后命速宣押。趙汝愚復以爲請。帝手札遣使召。

光寧授受事出非常廢立之嫌實所不免觀汝愚之對侂冑及其拜右相謂不幸處君臣之變豈敢言功頗為明于大義然口雖不自居功而于爪牙之臣則謂當推賞是于定策二字豈盡釋然于胸中而當時物論紛紛皆以汝愚功在社稷不免推崇太過異日

正還

侍御史張叔椿請議正棄國之罰。汝愚首裁抑僥

倖收召四方知名之士中外引領望治

按是月除拜諸人續綱目前後

參錯今依寧宗本紀及幸輔表改正

加殿前都指揮使郭杲武康節度使知閤門事韓侂冑汝州防禦使

韓侂冑欲推定策功趙汝愚曰吾宗臣汝外戚也何可

以言功惟爪牙之臣則當推賞乃加杲節鉞但遷侂冑

防禦使侂冑大失望然以傳導詔旨浸見親幸

知臨安府徐誼

告汝愚曰侂冑異時必為國患宜飽其欲而遠之不聽

汝愚欲推葉適之功適辭曰國危效忠職也適何功之有及聞侂冑歛望言于汝愚曰侂冑所望不過節鉞宜與之不從適歎曰禍自此始矣遂力求補外

以趙汝愚為樞密使



奸人構陷至稱其實有異  
謀禍源未必不萌于此也

汝愚既免兼參知政事。詔拜右丞相。汝愚辭曰。同姓之  
卿。不幸處君臣之變。敢言功乎。乃命為樞密使。尋又以羅點簽

書院事。

貶內侍陳源等十人。

侍御史章穎

字茂獻。臨江軍人。

論源及楊舜卿。林億年。離間之

罪。詔皆貶官斥外。

八月。召知潭州朱熹為煥章閣待制兼侍講。

先是。黃裳為嘉王府翊善。光宗諭之曰。嘉王進學。皆卿

之功。裳謝曰。若欲進德修業。追跡古先哲王。則須尋天

下第一等人。光宗問為誰。裳以熹對。

彭龜年為嘉王府直講。因講魯莊公

不能制其母云。母不可制。當制其侍御僕從。王問此誰之說。對曰。朱熹說也。自後每講必問熹說如何。至

是趙汝愚首薦熹遂自知潭州召入經筵熹在道聞泰  
安朝禮尚缺近習已有用事者卽具奏云陛下嗣位之  
初方將一新庶政所宜愛恤名器若使倖門一開其弊  
不可復塞至于博延儒臣專意講學必求所以深得親  
懽者爲建極導民之本思所以大振朝綱者爲防微慮  
遠之圖不報且辭新命不許及入對首言乃者大皇太  
后躬定大策陛下寅紹丕  
圖可謂處之以懽而庶幾不失其正今反不能無疑于  
逆順之際竊爲陛下憂之猶有可諉者亦曰陛下之心  
前日未嘗有求位之計今日未嘗忘思親之心此則所  
以行懽而不失其正之根本也充未嘗求位之心以盡  
負罪引慝之誠充未嘗忘親之心以致溫清定省之理  
始終不越乎此而大倫正大本立矣時趙彥逾按視孝  
宗山陵以爲土肉淺薄下有水石孫逢吉覆按乞別求  
吉兆有旨集議熹上議狀言壽皇聖德衣冠之藏當博  
求名山不宜偏信臺史委  
之小泉沙磧之中不報



增置講讀官。

從趙汝愚之請。以給事中黃裳。中書舍人陳傅良。彭龜年爲之。詔經筵官開陳經旨。救正缺失。

內批罷左丞相留正。

韓侂胄浸謀預政。數詣都堂。正使省吏諭之曰。此非知閣日往來之地。侂胄怒而退。會正與汝愚議。攢宮不合。侂胄因間之于帝。遂以手詔罷正。出知建康府。正謹法度。惜名器。毫髮不可干以私。與周必大俱以相業稱。以趙汝愚爲右丞相。

汝愚本倚留正共事。正之罷。由中旨。汝愚怒韓侂胄。不以告。及來謁。因不見之。侂胄慙忿。羅點謂汝愚曰。公誤

水性就下黃河自北而南在漢已然觀武帝瓠子歌有淮泗滿之文可知河之入淮不自宋始宣房之塞力倍工堅故能經久不潰宋熙寧時王安石秉政任非其人用功苟且所以才及百年即大徙而不可復塞議者乃謂金欲以宋為壑利河之南而不欲其北故不復治真曲說也

矣。汝愚悟乃見之。侂冑終不懌。

河決金陽武。

考黃河自金明昌五年南北分流從此南流不能復塞關係甚鉅續綱目失載今採金史

章宗紀及河渠志兼採胡渭禹貢錐指增輯

河決陽武故堤灌封邱而東歷曹濮鄆范諸州縣界中。

至壽張注梁山灤分為二派北派由北清河

即今大清河注見前

入海南派由南清河

即泗水注亦見前

入淮禹貢錐指河匯梁山灤分二派入南

北清河自宋熙寧十年始尋經塞治至是復行其道而河流又一大變

九月簽書樞密院事羅點卒。

點孝友端介不為矯激之行或謂天下事非才不辦點

曰當論其心心苟不正才雖過人果何取哉時給事中

黃裳亦卒趙汝愚泣謂帝曰黃裳羅點相繼淪謝二臣



不幸。天下之不幸也。

以京鏜簽書樞密院事。

初帝欲除鏜帥蜀。趙汝愚謂人曰。鏜望輕資淺。豈可當此方面。鏜聞而憾之。由是韓侂胄引以自助。

却瑞慶節賀表。

前此改生日天祐節爲瑞慶節。

從朱熹奏也。

冬十月。內批以謝深甫爲御史中丞。劉德秀爲監察御史。罷右正言黃度。

韓侂胄日夜謀去趙汝愚。知閣門事劉弼

雪川人。

亦以不

得預內禪。心懷不平。因謂侂胄曰。趙相欲專大功。君豈惟不得節鉞。將恐不免嶺海之行。侂胄愕然問計。弼曰。

惟有用臺諫耳。侂冑問若何而可。攷曰：御筆批出是也。侂冑然之。遂以內批拜給事中。謝深甫爲中丞。會汝愚請令近臣薦御史。侂冑密以其黨劉德秀屬深甫。遂以內批用之。由是劉三傑、李沐湖州德清人。彥穎之子。等牽連以進。言路皆侂冑之人。排斥正士。朱熹憂其害政。每因進對。爲帝切言之。又約吏部侍郎彭龜年同劾侂冑。會龜年出護使客。不果。熹復白汝愚。當以厚賞酬侂冑之勞。勿使預政。汝愚爲人疏。謂其易制。不以爲慮。黃度將上疏論侂冑之姦。侂冑覺之。以御筆除度知平江府。政和中。軍爲府隸兩浙。路今蘇州府是。度言蔡京擅權。天下所由以亂。今侂冑假御筆逐諫臣。使俛首去。不得效一言。非國之利也。固



辭奉祠歸養

閏月詔議祧廟

時以孝宗祔廟議宗廟迭毀之制孫逢吉曾三復

字無玷臨

江人首請并祧僖宣二祖奉太祖居第一室祫祭則正東

向之位有旨集議僖順翼宣四祖祧主宜有所歸自太

祖首尊四祖之廟治平間議者以世數寢遠請遷僖祖

于夾室後王安石等奏僖祖有廟與稷契無異請復其

舊丞相趙汝愚不以復祀僖祖爲然侍從多從其說吏

部尚書鄭僑

字惠叔興化人

欲且祧宣祖而祔孝宗侍講朱熹

獻議力主王安石之說

畧謂藏四祖之主于夾室是以

別立一廟則喪事卽遠有毀無立議者急欲尊奉太祖以東嚮之故不知實無益于太祖之尊徒使僖祖太祖

祧廟何等重大之事。廷既有異同。自當和衷集議。折中至當。然後請詔旨而行之。乃榻前之奏。寧宗方爲稱善。而四祖之廟已遽事毀遷。則是所謂別建一殿以奉祧主者。亦出自宰臣之意。而寧宗並未與知矣。總由南渡以後。乾綱不振。雖以汝愚在位。尚不免有專擅之失。其他又何責乎。

兩朝威靈相與爭校。強弱于冥冥之中。并使四祖之神疑于受擯。令人痛傷。今當以僖祖爲始祖。如周之后稷。太祖如文王。太宗如武王。與仁祖之廟皆萬世不祧。又據程頤之說。以爲僖祖不當祧。順以下祧可也。或難以僖祖無功業。不知物豈有無本而帝召對。熹復以所論生者。安石所見終高于世俗之儒。帝召對。熹復以所論畫爲圖本。陳奏久之。帝稱善曰。可于榻前撰數語。徑批出施行。熹方懲內批之弊。因乞降出劄子。再令集議。帝然之。熹退。卽進擬詔意。以上意諭廟堂。則聞已毀四祖廟而遷之矣。于是別建一殿以奉祧主。而藝祖始正東向之位。續綱目于熹之議採錄不詳。又云廟堂不以聞而毀撤僖宣廟室。按熹既具議。又經面陳。安得云不以聞乎。今依通考及宋史禮志原文改正。

內批罷煥章閣待制兼侍講朱熹。

熹每進講。務積誠意。以感動帝心。以平日所論著。敷陳



開析坦然明白。可舉而行。講畢。有可以開益帝德者。罄  
竭無隱。帝亦虛心嘉納焉。至是以黃度之去。因講畢。奏  
疏極言。陛下卽位。未能旬月。而進退宰臣。移易臺諫。皆  
出陛下之獨斷。中外咸謂左右或竊其柄。臣恐主威下  
移。求治反亂矣。疏入。侂冑大怒。使優人綦冠濶袖。象大  
儒。戲于帝前。因乘間言。熹迂濶不可用。帝方倚任侂冑。  
乃出御批云。憫卿耆艾。恐難立講。已除卿宮觀。趙汝愚  
袖御筆見帝。且諫且拜。帝不省。汝愚因求罷政。不許。越  
二日。侂冑使其黨封內批付熹。熹卽附奏謝。遂行。中書舍人  
陳傅良。封還錄黃。起居郎劉光祖。起居舍人鄧驥。御史  
吳獵。吏部侍郎孫逢吉。登聞鼓院游仲鴻。交章留熹。不  
報。傅良。光祖。亦坐罷。熹登第五十年。仕于外。僅九考。立  
朝纔四十六日。進講者七。知無不言。既去。侂冑益無所

忘憚矣。游仲鴻字子正果州南充人。

十一月以韓侂冑兼樞密院都承旨。

初詔侂冑可特遷二官。侂冑覬覦節鉞意不滿。力辭。乃止。遷一官。爲宜州觀察使。怨趙汝愚益深。至是特遷都承旨。

詔行孝宗皇帝喪三年。

先是有司請于易月之外。用漆紗淺黃之制。朱熹奏言。自漢文短喪。歷代因之。天子遂無三年之喪。人紀廢壞。三綱不明。千有餘年。莫能釐正。壽皇聖帝。至性自天。易月之外。猶執通喪。朝衣朝冠。皆用大布。所宜著在方冊。爲萬世法程。陛下以世嫡承大統。承重之服。著在禮律。



宜遵壽皇已行之法。一時倉卒不及詳議。遂用漆紗淺黃之服。使壽皇已行之禮。舉而復墜。臣竊痛之。然既往之事。不及追改。啟殯發引。禮當復用初喪之服。至是。詔遵用三年之制。中外百官。皆以涼衫視事。蓋用熹言也。葬永阜陵。

史臣曰。高宗以公天下之心。擇太祖之後而立之。乃得孝宗之賢。聰明英毅。卓然爲南渡諸帝稱首。卽位之初。銳志恢復。重違高宗之命。不輕出師。又值金國平治。無釁可乘。然易表爲書。改臣稱姪。減去歲幣。以定鄰好。金人易宋之心。至是亦浸異于前日。故世宗每戒羣臣積錢穀。謹邊備。蓋忌帝之將有爲也。天厭兵革。欲休生民。故帝用兵之志。弗遂而終。自古人君起自外藩。入繼大統。而能盡宮庭之孝。未有若帝者。終喪三年。又能却羣臣之請。而力行之。廟號孝宗。其無愧矣。

十二月。金平章政事完顏守貞罷。

按守貞之罷。續綱目誤書于明年之冬。今據金

史章宗本  
紀改正。

守貞剛忠明亮。通習典故。凡論對必傳經義。時金有國七十年。禮樂刑政多因舊制。金主欲更定修正。爲一代法。其儀式條約多守貞裁訂。故明昌之治。號稱清明。又好接引善類。以列朝廷。爲胥持國所忌。罷去。

內批罷吏部侍郎兼侍講彭龜年。進韓侂冑一官。

侂冑寵擅權衆皆切齒。寧宗豈無所聞。卽向時爲所朦蔽。而龜年旣條奏其奸。亦當徐察。以分真僞。兩罷之。尚且不可。乃忽出內降。龜年與外。而侂冑進官。惜庸若此。何怪奸臣之不日益恣橫乎。

侂冑權勢日重。龜年條奏其姦。請去之。且云陛下逐朱熹太暴。故欲陛下亦亟去小人。毋使天下人謂陛下去君子易。去小人難。于是龜年。侂冑俱請祠。帝欲兩罷之。陳騏進曰。以閣門去經筵。何以示天下。旣而內批龜年與郡。侂冑進一官。與在京宮觀給事中林大中。字和叔。婺州永康人。



康人。中書舍人樓鑰。

字大防。明州鄞縣人。

繳奏以爲非是不聽。由是

侂冑愈橫。明年又加侂冑保寧節度使。

陳騤罷。以余端禮知樞密院事。京鏜參知政事。鄭僑同知樞密院事。

騤與趙汝愚素不協。未嘗同堂語。及爭彭龜年事。韓侂冑語人曰。彭侍郎不貪好官。固也。元樞亦欲爲好人耶。故罷之。而引京鏜居政府。以間汝愚。汝愚孤立于朝。天子亦無所倚信。

罷起居舍人劉光祖。

劉德秀劾之也。

以趙彥逾爲四川制置使。

工部尚書趙彥逾以有功于帝室。冀趙汝愚引居政府。及除蜀帥。大怒。遂與韓侂冑合。因陛辭。疏廷臣姓名于帝。指爲汝愚之黨。且曰。老奴今去。不惜爲陛下之言。由是帝亦疑汝愚矣。

### 寧宗皇帝

乙卯慶元元年。金明昌六年。春正月。白虹貫日。

二月。罷右丞相趙汝愚。

韓侂冑欲逐汝愚而難其名。謀于京鏜。鏜曰。彼宗姓也。誣以謀危社稷。則一網打盡矣。侂冑然之。以秘書監李沐嘗有怨于汝愚。引爲右正言。使奏汝愚以同姓居相位。將不利于社稷。乞罷其政。以尊安天位。杜塞姦源。是



日汝愚出浙江亭待罪。遂以觀文殿學士出知福州。謝

深甫等論汝愚冒居相位。今既罷免。不當加以書殿隆

名。帥藩重寄。乞令奉祠請咎。命提舉洞霄宮。直學士院

詞有曰。頃國家之多難。賴碩輔之精忠。持危定傾。安社稷。以爲悅。任公竭節。利國家無不爲。坐無貶辭。亦免官。

兵部侍郎章穎侍經幃。帝曰。諫官有言。趙汝愚者。卿等

謂何。同列漫無可否。穎奏言。天地變遷。人情危疑。加以

敵。人嫚侮。國勢未安。未可輕退。大臣願降詔宣諭。汝愚

毋聽其去。國子祭酒李祥言。去歲國遭大戚。中外洶洶。

留正棄宰相而去。官僚幾欲解散。軍民皆將爲亂。兩宮

隔絕。國喪無主。汝愚以樞臣。獨不避殞身滅族之禍。奉

太皇太后命。翊陛下以登九五。勛勞著于社稷。精忠貫

于天地。乃卒受黜黜而去。天下後世其謂何。知臨安府

徐誼。素爲汝愚所器。又嘗勸汝愚早退。及豫防侂冑之

姦。侂冑尤怨之。及是。與國子博士楊簡。亦抗論留汝愚。

李沐劾爲黨。皆斥之。李祥。字元德。常州無錫人。楊簡。字微中。慈谿人。

三月丙戌朔日食。

夏四月安置大府寺丞呂祖儉字子約。祖謙弟。于韶州。

祖儉上書訴趙汝愚之忠併論朱熹彭龜年李祥不當

罷斥語侵韓侂冑有旨祖儉朋比罔上送韶州安置中書

舍人鄧驛繳奏祖儉不當貶不從樓鑰因進讀論及之

侂冑語人曰復有論救祖儉者當處以新州衆乃不敢

言或謂侂冑曰自趙丞相去天下已切齒今又投祖儉

漳鄉不幸或死則怨益重侂冑始改送吉州祖儉嘗曰

因世變有所摧折失其素履者固不足言因世變而意

氣有所加者亦私心也竟死吉州新州唐置明廢今

廣東肇慶府新興縣是吉州隋置今江西吉安府是

以余端禮為右丞相鄭僑叅知政事京鏜知樞密院事謝

深甫簽書院事

流太學生楊宏中字充甫福州人等六人

宏中與周端朝字子靜温州人張衡字用叟福州人林仲麟字景冲福州人蔣



傅

字象夫。信州人。

徐範

字羹父。福州侯官人。

六人

伏闕上書言近者諫官

李沐論罷趙汝愚中外咨憤而李沐以爲父老歡呼蒙

蔽天聽一至于此陛下獨不念去歲之事乎人心驚疑

變在朝夕是時假非汝愚出死力定大議雖百李沐罔

知攸濟當國家多難汝愚位樞府本兵柄指揮搃縱何

向不可不以此時爲利今上下安妥乃有異意乎章穎

李祥楊簡發于中激力辯其非卽遭斥逐李沐自知邪

正不兩立思欲盡覆正人以便其私必託朋黨以罔陛

下之聽臣恐君子小人消長之機于此一判則靖康已

然之驗何堪再見于今日耶伏願陛下念汝愚之忠勤

察祥簡之非黨灼李沐之回邪竄沐以謝天下還祥等

以收士心。疏上。詔宏中等罔亂上書。煽搖國是。悉送五百里外編管。

五月。詔諸路提舉司置廣惠倉。

修胎養之令也。

未幾。余端禮鄭僑言。福建地狹人稠。無以贍養。生子多不舉。福建提舉宋之瑞。

乞免鬻建。劍。汀。邵。沒官田。收其租。助民舉子之費。詔從之。

六月。右正言劉德秀乞考核邪正真偽。遂罷國子司業汪達等。

自程顥。程頤。傳孔孟千載之學。其徒楊時。傳之羅從彥。從彥傳之李侗。朱熹師侗。其學大振。流俗醜正。多不便之。遂有道學之名。陰以攻詆。及韓侂胄用事。士大夫素爲清議所擯者。乃教以凡相與異者。皆道學之人也。陰



疏姓名授之俾以次斥逐。或又言以道學目之。則有何罪。當名曰偽學。蓋謂貪黷放肆。乃人真情。廉潔好修者。皆偽耳。由是有偽學之目。善類皆不自安。至是德秀上言。願考核真偽。以辨邪正。詔下其章。由是博士孫元卿。樂清人。袁燮。字和叔。慶元府鄞縣人。國子正陳武皆罷。汪逵入劄子。

辨之德秀以逵為狂言。亦被斥。

中丞何澹急欲執政。亦上疏言專門之學。流而

為偽。文詐沽名。願風勵學者。專師孔子。不必自相標榜。詔榜于朝堂。澹復上疏言。在朝之臣。大臣既熟知其邪迹。然亦不敢白發。以招報復之禍。望明詔大臣。去其所當去者。

冬十一月。竄故相趙汝愚于永州。

按汝愚卒于明年正月。續綱目併繫于此。殊失

實。今改正。

韓侂胄忌汝愚。必欲置之死。以息人言。至是用何澹疏。

乘龍授鼎幻想不經汝愚  
果有此妖夢胡紘輩文孰  
從而知之蓋必自經傳述  
以為聖寧宗素服即位之  
驗故奸徒得執為左証劾  
其假為符耳大臣不幸  
慮疑之間不自知畏懼  
轉傳定策之徵所見已  
乖正則其賈禍不得謂  
非自取也

落汝愚觀文殿大學士及宮觀監察御史胡紘。字應期處州遂昌人。遂上言。汝愚倡引偽徒。謀為不軌。乘龍授鼎。假夢為符。因條奏其十不遜。且及徐誼。詔責汝愚寧遠軍節度副使。永州安置。誼惠州團練副使。南安軍安置。時汪義端當制。遂用漢誅劉屈氂。唐戮李林甫事。示欲殺之之意。廸功郎趙師召亦上書乞斬汝愚。帝不從。汝愚怡然就道。謂諸子曰。觀侂冑之意。必欲殺我。我死。汝曹尚可免也。

丙辰二年。金承安元年。春正月。故相趙汝愚卒于衡州。

汝愚行至衡州。病作。衡守錢鏐承侂冑密諭。窘辱百端。汝愚暴卒。天下聞而冤之。訃聞。有旨追復原官。許歸葬。中書舍人吳宗旦繳還復官之命。汝愚學務有用。常以司馬光富弼韓琦范



語錄各爲一家言固不能  
無醇疵參半之失除毀猶  
可說也若六經四子皆聖  
賢載道之文有益而無損  
自炎劉以來布在學官守  
而弗墜乃亦概施屬禁其  
去腐秦燔書之毒幾何

仲淹自期凡平昔所聞于師友如張栻朱熹呂祖謙汪

應辰王十朋胡銓李壽林光朝之言欲次第行之未果  
而罷政初汝愚嘗夢孝宗授以湯鼎背負白龍升天  
後翼嘉王以素服卽位蓋其驗也讒者遂以爲罪云

以余端禮京鏐爲左右丞相謝深甫叅知政事鄭僑知樞  
密院事何澹同知院事

二月以端明殿學士葉翥知貢舉

翥與劉德秀同知貢舉奏言僞學之魁以匹夫竊人主  
之柄鼓動天下故文風未能丕變乞將語錄之類盡行  
除毀故是科取士稍涉義理者悉皆黜落六經語孟中  
庸大學之書爲世大禁

夏四月余端禮罷

端禮始與趙汝愚同心共政及汝愚竄逐端禮不能救

後黃度。呂祖儉之獲罪。端禮救解不獲。遂爲公議所責。在相位期年。爲韓侂胄所制。抑鬱不愜志。稱疾求退。乃以觀文殿大學士。提舉洞霄宮。

以何澹叅知政事。葉翥簽書樞密院事。罷吏部。按倪思本傳。時爲吏

部。續綱目作禮誤。侍郎倪思。

初。翥要思列疏論僞學。思不從。至是。御史姚愈。平江人。劾思。遂出知太平府。

秋。七月。罷殿中侍御史黃黼。字元章。臨安餘杭人。

中書舍人汪義端。以僞學之黨皆名士。欲盡除之。太皇太后聞而非之。帝乃詔臺諫給舍論奏。不必更及舊事。務在平正。以副朕建中之意。詔下。韓侂胄及其黨皆怒。



自是政治之志愈急矣。黃黼上言。治道在黜首惡而任其賢。使才者不失其職。而不才者無所憾。故仁宗嘗曰。朕不欲留人過失于心。此皇極之道也。遂罷黼而以姚愈代之。

八月。禁用僞學之黨。

太常少卿胡紘上書言。比年以來。僞學猖獗。賴二三大臣臺諫。出死力而排之。故元惡殞命。羣邪屏跡。自御筆存救。偏建中之說。或者誤認天意。取前日僞學姦黨。次第用之。以冀倖其他日。不相報復。往者建中靖國之事。可以爲戒。陛下何未悟也。宜令退伏田里。循省愆咎。遂詔僞學之黨。宰執權住進擬。自是學禁愈急。

大理司直邵哀然言

三十年來。偽學顯行。場屋之權。盡歸其黨。乞詔大臣。盡察其所學。詔偽學之黨。勿除在內。差遣已而言者。又論偽學之禍。乞鑒元祐調停之說。杜其根源。遂有詔監司帥守。薦舉改官。並于奏牘前。聲說非偽學之人。會鄉試。漕司前期。取家狀。必令書以不是偽學五字。撫州推官柴中行。獨申漕司云。自幼習易。讀程氏易傳。如以為偽。不願考校。士論壯之。

冬十月。召陳賈為兵部侍郎。

以其嘗擊朱熹也。

十二月。削祕閣修撰朱熹官。竄處士蔡元定。

字季通。建州建陽人。于

道州。

熹家居。自以蒙累朝知遇之恩。且常帶從臣職名。義不容默。乃草封事數萬言。陳姦邪蔽主之禍。因以明丞相趙汝愚之冤。子弟諸生。更進迭諫。以為必且賈禍。熹不



聽蔡元定請以著決之。遇遜之同人。熹默然取藁焚之。遂上奏力辭職名。詔仍充秘閣修撰。時臺諫皆韓侂冑所引。洶洶爭欲以熹爲奇貨。然無敢先發者。胡紘未達時。嘗謁熹于建安。熹待學子惟脫粟飯。遇紘不能異也。紘不悅。及是爲監察御史。乃銳意以擊熹爲已任。物色無所得。經年醞釀。章疏乃成。會改太常少卿。不果。有沈繼祖富川人者。爲小官時。嘗採摭熹語孟之語以自售。至是以追論程頤得爲御史。紘以疏草授之。繼祖謂可立致富貴。遂誣論熹十罪。且言熹剽竊張載。程頤之餘論。簣鼓後進。乞褫熹職。罷祠。其徒蔡元定。佐熹爲妖。乞送別州編管。詔熹落職罷祠。竄元定于道州。已而選人余

熹上書乞斬熹以絕僞學謝深甫抵其書于地語同列曰朱元晦蔡元定不過自相講明耳果何罪乎事乃止

元定生而穎異父發問覽羣書以程氏語錄邵氏經世張氏正蒙授元定曰此孔孟正脈也元定深涵其義既長辨析益精登建陽西山頂忍饑啖糞以讀書聞熹名往師之熹叩其學驚曰季通吾老友也尤袤楊萬里交薦于朝召之不起曾偽學黨禁之論起元定曰吾其不免乎及聞竄不辭家即就道同其子沈行三千里足為流血無幾微見言面至春陵遠近來學者甚衆愛元定者謂宜謝生徒元定曰彼以學來何忍拒之若有禍患亦非閉門塞實所能避也貽書訓諸子曰獨行勿愧影獨寢不愧衾勿以吾得罪故遂懈其志在道逾年卒學者尊之曰西山先生熹嘗曰造化微妙惟深于理者能識之吾與季通言而不厭也每諸生請疑必令先質元定而後為之折衷小人尤深嫉之故是時有朱熹倡僞蔡元定實羽翼之之奏楊萬里字廷秀吉州吉水人蔡沈字仲默

丁巳三年金承安春正月鄭僑罷



夏。閏六月。貶留正為光祿卿。

正既罷相。繼為劉德秀所劾。

初。德秀未為正所知。正客范仲黼以為言。正曰。此人

若留之班行。朝廷必不靜。乃除大理簿。德秀憾之。自是彈者無虛歲。朝散大夫劉三傑免喪入見。論偽學之黨。今變而為逆黨。防之不可不至。及論留正共引

偽學之罪。僞中六喜。即日降旨除三傑右正言。正坐貶邵州居住。

按正本傳。正之貶光祿卿。由張釜劾之。與續綱目異。張釜字君量。綱之孫。

秋。八月。金胥持國有罪免。

持國為金主信任。與李妃笄擅朝政。張復亨

右司諫。張嘉

貞。右拾遺。

趙樞

同知豐安軍節度使事。

張光庭

同知定海軍節度使事。

高元甫

戶部主事。

張巖叟

刑部員外郎。字孟。強代州五臺人。

傅汝梅。張翰

字林卿。忻州秀容人。

裴元郭。郭

四人。皆尚書省令史。

皆趨走其門。謂之胥門十哲。

續綱目云。

十人俱為御史臺官。按持國本傳。十人之官。班可考。必因為御史臺所劾。而誤也。今改正。

至是為

御史臺所劾。持國致仕。十人皆外補。續綱目云。九月復以持國參知政事。

按持國本傳。言頃之起為樞密副使。佐樞密使內族襄治軍于北京。翰林修撰路鐸恐其復相。因他事奏持國奸邪。金主曰。朕豈以此人復為相耶。持國尋死。據此則持國並未復為參知政事。續綱目誤。今削之。內族襄本名按錫。固納孫。路鐸字宣叔。冀州人。按舊作金。錫固納。舊作什古廼。今改。後仿此。

冬十一月。太皇太后吳氏崩。諡曰憲聖慈烈。

十二月。籍偽學。罷吏部侍郎黃由。字子由。長洲人。

知綿州王沆上疏。乞置偽學之籍。仍自今曾受偽學舉

薦。關陞及刑法。廉吏自代之人。並令省部籍記姓名。與

閒慢差遣。從之。于是偽學得罪者。凡五十九人。宰執則有趙汝

愚留正。周必大。王藺等四人。待制以上。則有朱熹。徐誼。

彭龜年。陳傅良。薛叔似。章穎。鄭湜。樓鑰。林大中。黃由。黃

黼。何異。孫逢吉等十三人。餘官。則有劉光祖。呂祖儉。葉

適。楊芳。項安世。李璣。沈有開。曾三聘。游仲鴻。吳獵。李祥



楊簡。趙汝讜。趙汝談。陳峴。范仲黼。汪達。孫元卿。袁燮。陳武。田澹。黃度。詹體仁。蔡幼學。黃顥。周南。吳柔勝。王厚之。孟浩。趙鞏。白炎。震等三十一人。武臣則有皇甫斌。范仲壬。張致遠等三人。士人則有楊宏中。周端朝。張衡。林仲麟。蔣傳。徐範。蔡元定。呂祖泰等八人。何異。字同叔。撫州崇仁人。李重。燾之子。曾三聘。字無逸。臨江新淦人。趙汝讜。字蹈中。趙汝談。字履常。陳峴。字壽南。溫州平陽人。周南。字南仲。平江人。吳柔勝。字勝之。宣州人。張致遠。字里無考。與紹興中官侍御史者當別。黃由。上言。人主不是一人。呂祖泰。字泰然。祖儉從弟。

可待天下以黨與。不必置籍以示不廣。殿中侍御史張

巖。字肖翁。大梁人。徙家揚州。劾由阿附。罷之。而擢沈為利州路轉運

判官。

戊午四年。金承安三年。春正月。以葉翦同知樞密院事。

詔有司寬恤兩浙江淮荆湖四川流民。

三月。葬憲聖慈烈皇后。

夏五月。加韓侂冑少傅。封豫國公。

詔嚴偽學之禁。

先是張釜請下詔禁偽學。姚愈復上言。近世行險僥倖之徒。倡爲道學之名。權臣力主其說。結爲死黨。願下明詔。播告天下。于是命直學士院高文虎字炳如。四明人。草詔諭告。宜各改視回聽。毋復借疑似之說。以惑亂世俗。詔旣下。韓侂冑大喜。卽遷文虎。愈于斐職。

秋七月。葉翥罷。

八月。以謝深甫知樞密院事。許及之。

字深甫。溫州永嘉人。

同知院事。

及之爲吏部尚書。諂事侂冑。無所不至。居二年不遷。見侂冑流涕。叙其知遇之意。衰遲之狀。不覺屈膝。侂冑惻



然憐之。故有是命。

侂冑嘗值生辰。羣公上壽。既畢集。及之適後至。閤人掩關拒之。及之大窘。

會門闢未及開。遂俯僂而入。當時有由竇尚書屈膝執政之語。傳以為笑。

育太祖十世孫與愿于宮中。賜名曦。

帝未有嗣。京鎰等請擇宗室子育之。詔育燕懿王德昭

九世孫與愿于宮中。年六歲矣。尋以為福州觀察使。賜

名曦。封衛國公。

以趙師霁

字從善。燕懿王八世孫。

為工部侍郎。

師霁附韓侂冑。得知臨安府。侂冑生日。百官爭貢珍異。

師霁最後至。出小台曰。願獻小果核侑觴。啟之。乃粟金

蒲桃小架。上綴大珠百餘顆。眾慙沮。侂冑有愛妾張譚

王陳四人。皆封郡夫人。其次有各位者。又十人。或獻北

及之語。事侂冑。甘于屈膝。由實衣冠掃地矣。然猶出自寒門。或易流于汙賤。不足深責。若師霁屬在天潢。當自存其尊貴。乃亦獻媚。

樽前至效大噱而不顧并  
笑可耻孰甚孔子謂鄙夫  
患矣無所不至斤其不可  
與事君正為此輩痛加鍼  
砭耳

珠冠四枚于侂冑。侂冑以遺四夫人。其十人亦欲之。未  
有以應也。師異聞之。亟市北珠製十冠以獻。十人者喜  
爲求遷官。拜工部侍郎。侂冑嘗與衆客飲南園。過山莊  
顧竹籬草舍曰。此真田舍間氣  
象。但欠犬吠雞鳴耳。俄聞犬吠雞鳴。視  
之。乃師異也。侂冑大笑。聞者莫不鄙之。  
冬十月。金造承安寶貨。

巳未五年。金承安四年。春正月。奪前起居舍人彭龜年等官。

初。趙汝愚定策時。樞密院直省官蔡璉從旁竊聽。因而  
漏言。汝愚竄之。既而逃還臨安。韓侂冑聞之。乃使璉誣  
告汝愚定策時。有異謀。具列賓僚所言。凡七十餘紙。詔  
下大理。捕鞫彭龜年。曾三聘。沈有開。葉適。項安世等。以  
實其事。奪龜年三聘官。而擢璉進義副尉。



二月。放主管玉虛觀劉光祖于房州。

光祖撰涪州學記。謂學者明聖人之道以修其身。而世方以道爲僞。以學爲棄物。好惡出于一時。是非定于萬世。諫議大夫張金劾光祖。佐逆不成。蓄憤懷姦。欺世罔上。詔落職。房州居住。

夏五月。行統天歷。

先是詔造新歷。至是成。賜名統天。蓋自建隆迄慶元。二百五十年間。歷十四變。上距黃帝之歷凡五十變矣。議者謂自渡江以來。統天新歷尤疎謬。

秋八月。帝始朝太上皇于壽康宮。

太上皇疾平。帝率羣臣詣壽康宮上壽。成禮而還。明日

書始朝則前此之不朝可知。寧宗即位至是已閱五年。定省之禮闕焉。不講夫以父子至性睽隔久遠。返

之子心其能安乎且光宗之不朝壽皇在廷交章論諫至有內禪之舉寧宗追思前事更當痛心疾首乃不知幹蠱而顯昭覆車羣臣方以上壽禮成相率稱賀寧宗亦竟覲顏受之真不解具何肺腑然光宗不孝寧宗故寧宗亦不孝光宗天道好還此之謂矣

羣臣以過宮上壽禮成奉表稱賀。

九月加韓侂胄少師封平原郡王。

是歲諸州大水。

庚申六年。金承安五年。春閏二月以京鏜謝深甫爲左右丞相何澹知樞密院事。

初淳熙中鏜以使金守禮遂見擢用。事具前。及帥蜀罷征

斂斬瀘州卒之殺太守者蜀以大治旣與趙汝愚有隙

事亦見前。爲韓侂胄所引遂大變其守于國事無可否又薦

劉德秀排擊善類士論醜之未幾卒。

三月故祕閣修撰朱熹卒。嘉定二年諡曰文。

時攻僞學日急熹與諸生講學不休或有勸其謝遣生



徒者笑而不答。疾且革。正坐整衣冠。就寢而卒。年七十。

一熹所著。有易本義。啟蒙著卦考誤。詩集傳。大學中庸。

章句。或問。論語孟子集註。太極圖通書。西銘解。楚辭集。

註辨正。韓文考異。所編次。有論孟集義。孟子指要。中庸。

輯畧。孝經刊誤。小學書。通鑑綱目。宋名臣言行錄。家禮。

近思錄。河南程氏遺書。伊洛淵源錄。儀禮經傳通解。其。

門人不可勝計。最知名者。黃幹。李燾。字敬之。南張洽。字

德臨。江人。陳淳。字安卿。漳李方子。字公晦。建昌人。黃灝。字商伯。南

清江人。輔廣。字漢卿。本河朔蔡沈。黃幹歷知臨川。新淦兩縣。又

皆有異政。在安慶日。金人已破光山。民震恐。幹請于朝。

城安慶。以資捍禦。後江水暴至。又以城堅。免于漂溺。舒。

人德之。幹嘗入荆湖幕府。奔走諸關。與江淮豪傑游。幹。

倜儻有謀。軍民之心。翕然歸向。權要忌之。會召幹赴行。

在爲御史李楠所劾。幹遂歸里。弟子日盛。編著禮書。卒  
贈朝奉郎。李燾。初授岳州教授。教士不因時好。且曰。古  
人皆通材。用則文武兼焉。故卽武學諸生。文振而識高  
者。拔之。闕射圃。令習射。廩老將之長于藝者。率之。後除  
大理司直。辭。尋差江西運司幹辦公事。會洞寇作亂。燾  
請于帥臣。自往駐兵守險。馳辯士諭賊禍福。皆帖服。復  
改官潭州通判。真德秀帥長沙。一府之事。皆咨燾。不數  
日。辭歸。紹定中。理宗論及高士。史臣李心傳以燾對。不  
果召。卒。贈直文華閣。張洽。初授松滋尉。湖右經界不正。  
洽請行推排法。吏奸無所匿。改袁州司理。參軍。尋知永  
新縣。湖寇作亂。與縣接壤。民大恐。洽單車以往。延見隅  
官。訪利害而犒之。又結約土豪。得其懼心。寇聞有備。乃  
去。端平初。用薦召赴都堂審察。不至。將以說書待之。洽  
固辭。遂除直秘閣。卒。陳淳。性至孝。篤于內行。雖不用  
于世。而憂時論事。感慨動人。以特奏恩授安溪主簿。未上  
而卒。李方子。入太學。廷對擢第三。調泉州觀察推官。守  
真德秀以師友禮之。故事。秩滿。必先通書廟堂。方子曰。  
是求也。丞相史彌遠聞之。怒。踰年始除國子錄。無何。將  
選入官僚。方子不少貶。彌遠使臺臣劾之。遂罷。黃灝。知  
德化縣。以薦除登聞鼓院。歷太常寺丞。出知常州。提舉  
本路常平。時荐飢。有旨停閣夏稅。灝奏乞併停秋稅。不  
俟報行之。言者罪其專創兩秩而從其請。熹之卒也。黨



禁方厲。瀨單車往赴。無所顧云。蔡沈始從其父元定謫道州。父歿。徒步護喪以歸。有遺之金者。輒謝之。曰。不忍累先人也。年三十。屏棄舉子業。隱居九峯。著書傳。真德秀字景元。浦城人。李心傳字微之。舜臣之子。史彌遠字同叔。浩之子。新淦漢縣。今屬臨江府。安慶府。漢廬江郡地。宋慶元初。改德慶軍。曰安慶府。今屬安徽省。漢陽軍。唐置。今湖北漢陽府是。松滋。晉縣。今屬荊州府。永新縣。孫吳置。今屬吉安府。安溪縣。宋置。今屬泉州府。德化縣。五代王閏置。今屬永春州。餘注俱見前。

夏六月乙酉朔日食。

太上皇后李氏崩。

諡曰慈懿

詔權贊下修吉寺。

秋七月以陳自强

字勉之。福州閩縣人。

簽書樞密院事。

自强嘗為韓侂胄童子師。侂胄當國。自强入都待銓。侂胄諷從官論薦之。即除太學錄。由選人至樞府。裁四年。

八月。太上皇崩。

九月。處士呂祖泰上書。請誅韓侂胄。詔配祖泰于欽州牢城。貶周必大爲少保。

祖泰論世事無忌諱。先是祖儉以事貶。祖泰語其友曰。自我兄之貶。諸人箝口。我雖無位。義必以言報國。當少須之。今亦未敢以累我兄也。至是祖儉卒。祖泰乃擊登聞鼓上書。論韓侂胄有無君之心。請誅之以防禍亂。畧道學自古所恃以爲國者也。丞相汝愚。今之有大勲勞者也。立僞學之禁。逐汝愚之黨。是將空陛下之國。而陛下不知悟耶。陳自强。韓侂胄童稚之師。躡至宰輔。陛下舊學之臣彭龜年等。今安在耶。蘇師旦。平江之吏。召周筠。韓氏之厮役。人人知之。今師旦以潛邸隨龍。筠以皇后親屬。俱得大官。不知陛下在潛邸時。果識師旦乎。椒房之親。果有筠乎。侂胄徒自尊大。而卑陵朝廷。一至于此。願急誅侂胄。師旦。筠。而逐罷自强之徒。故大臣在者。



松既與祖泰狎友及其上書獲譴惟恐相累攻之不足遺餘力小人叵測固不足論然松誼事侂冑祖泰寧有不知與昧既已差池何必與之相狎取人不端謂非自貽患哉

獨周必大可用宜以代之不然事將不測書出中外大駭有旨祖泰挾私上

書語言狂妄拘管連州右諫議大夫程松

字冬老池州青陽人

與

祖泰狎友懼曰人知我與遊其謂我與聞乎乃獨奏言

祖泰有當誅之罪且其上書必有教之者今縱不殺猶

當杖黥竄之遠方殿中侍御史陳謨

字仲甫莆田人

亦以為言

乃杖祖泰一百配欽州收管祖泰既得罪監察御史林

采言偽習之成造端自周必大宜加貶削施康年亦言

必大首倡偽徒私植黨與遂貶必大為少保

冬十月加韓侂冑太傅

十一月皇后韓氏崩

諡曰恭淑

詔權攢于廣教寺

十二月葬永崇陵。

史臣曰。光宗幼有令聞。嚮用儒雅。卽位之初。總權綱。屏嬖倖。薄賦寬刑。有可觀者。及夫宮幃妒悍。閤寺交構。驚憂致疾。孝養日怠。孝宗之業衰矣。

嘉泰元年。金泰和元年。春三月。臨安大火。

四日乃滅。焚燒民居五萬三千餘家。自渡江以來。都城火災。未有如是歲者。帝下詔罪已。避殿減膳。出內府錢十六萬。米六萬餘斛。分賜被火之家。

吳氏世握兵柄。西蜀軍將不知有朝廷。至挺漸形跋扈。留正久欲謀殺其權。余端禮得行。止其承襲。皆不爲。無見吳曦旣身留行都。

秋七月。何澹罷。以陳自強參知政事。張釜簽書樞密院事。時吳挺子曦。爲殿前副都指揮使。自以世守西蜀。爲國藩屏。而身留行都。不得如志。乃賄賂宰輔。規圖帥蜀。未及賂澹。韓侂胄已許之。澹持不可。侂胄怒曰。始以君肯



正可遏其逆志以防後患  
乃俛仰止貪賄賂問恤國  
家統制之除如縱虎歸山  
負隅貽患豈真不容于誅  
夫

相就黜僞學汲引至此。今顧立異耶。遂罷奉祠。澹急于  
榮進。阿附侂冑。斥逐善類。賢士爲之一空。士論罪之。

以吳曦爲興州都統制。

曦至鎮。譖副都統制王大節罷之。更不除副帥。于是兵  
權悉歸于曦矣。自紹興末。王人出總蜀賦。移牒宣司。勢  
均禮敵。曦至蜀未幾。侂冑以總計隸宣  
撫。副使得節制按劾。而財賦之  
權。又歸于曦。于是異志遂成矣。

大旱。

八月。張釜罷。以張巖叅知政事。程松同知樞密院事。

皆附韓侂冑者。松諂侂冑尤甚。自知錢塘縣。不二年。爲  
諫議大夫。滿歲未遷。殊怏怏。乃市一妾獻之。名曰松壽。  
侂冑曰。奈何與大諫同名。答曰。欲使賤名常達鈞聽耳。

侂冑憐之。遂除同知樞密院事。

奈曼

韃靼別部。方輿紀要云。在葱嶺西。南。按奈曼。舊作乃蠻。今改。後仿此。

襲西遼。滅之。自宋徽宗

宣和七年。西遼達什稱帝。歷三傳乃滅。凡七十八年。

西遼主卓勒古出獵。奈曼王楚察里

舊作屈出律。今改。

伏兵八

千擒之。而據其位。尊卓勒古為太上皇。朝夕問起居。卓

勒古尋死。遼祀遂絕。

壬戌

三年。

金泰和二年。

春正月。以蘇師旦兼樞密都承旨。

初。韓侂冑為平江府兵馬鈐轄時。師旦以筆吏事之。侂

冑愛其辨慧。帝登極。竄姓名于藩邸吏士內。遂以隨龍

恩得官。至是權勢日盛。

二月。弛偽學黨禁。復諸貶謫者官。



僞學之禍。雖本于韓侂冑。欲去異已以快所私。然實京鏜創謀。而何澹。劉德秀。胡紘成之。及鏜死。三人亦罷。侂冑厭前事之乖戾。欲稍更改。以消中外之議。會張孝伯謂侂冑曰。不弛黨禁。恐後不免報復之禍。籍田令陳景思。故相康伯之孫侂冑之姻也。亦謂侂冑勿爲已甚。侂冑然之。于是趙汝愚。追復資政殿學士。黨人見在者。咸先後復官自便。時朱熹沒已踰年。周必大留正各已貶秩致仕。詔熹以待制致仕。必大復少傅。正復少保。

禁私史

有商人私持起居郎熊克中興小歷。及九朝通畧等書。欲渡泚盱眙軍以聞。遂命諸道察郡邑書坊所鬻書。凡

事干國體者悉令毀棄。言者因請取禮部員外郎李燾續通鑑長編。知龍州王偁東都事畧。監都鹽倉李丙丁未錄及通畧語錄家傳等書。下史官考訂。或有裨于公議。卽乞存留。不許刊行。從之。

夏五月甲辰朔日食。

秋七月程松罷。八月以袁說友字起巖建安人同知樞密院事。

冬十一月以陳自强知樞密院事。許及之叅知政事。

十二月立貴妃楊氏爲皇后。

后少以姿容選入宮。帝卽位。封婕妤。韓后崩。中宮未有所屬。時后爲貴妃。與曹美人俱有寵。韓侂冑以后頗涉書史。知古今。性警敏。任權術。而曹美人柔順。勸帝立曹



氏帝不從竟立后。由是后與侂胄有怨。

加韓侂胄太師。

先是監惠民局夏允中上書請依文彥博故事以侂胄

平章軍國重事。侂胄謬為辭謝。乞致仕。詔不許。而罷允

中。至是進位太師。

侂胄以勢利蠱士大夫之心。薛叔似辛棄疾陳謙等皆起廢顯用當時困

于久斥者。往往損晚節以規榮進。政府樞密臺諫侍從皆出侂胄之門。羣小滿朝。勢焰熏灼。

是歲大蝗。

癸亥

三年

金泰和三年

春正月。謝深甫罷。

初。深甫力求罷政。帝曰。卿能為朕守法度。惜名器。不可言去。至是固請。乃許之。

夏四月。己亥朔。日食。

五月以陳自强爲右丞相許及之知樞密院事。

時侂冑專權凡所欲爲宰執惕息不敢爲異。自强至印空名勅劄授之。惟所欲爲宰執不預知也。言路阨塞。每月按舉小吏一二人。謂之月課。又有泛論君德時事。皆取其陳熟緩漫。畧無撓拂者言之。或問之。則愧謝曰。聊以塞責耳。自强性貪鄙。四方致書餽。必題其緘云。某物戚。關通貨賄。仕進干請。必諧價而後予。都城大火。自强所貯一夕煨燼。侂冑首遺之。萬緡執政。列郡聞之。皆有助。不數月。得六十萬緡。遂倍所失之數。嘗語人曰。自强惟一死。以報師王。每稱侂冑爲恩主。恩父。蘇師旦爲叔。堂吏史達祖爲兄。侂冑姦尤專國。自强表裏之功爲多。史達祖字邦卿。汴人。

秋七月造戰艦。八月增置襄陽騎軍。

尋又置澈浦。

在今浙江嘉興府海鹽縣南。水經注。谷水于縣出爲澈浦。以通巨海。卽此水軍。



甲子四年。金泰和四年。春正月。韓侂胄定議伐金。

金自明昌末。北部哈達錦。

舊作合底。今改。

與桑節亥。

舊作山只昆。今改。

恃強擾邊。又有光嘉喇。

舊作廣吉。今改。

者。尤桀驁。屢脅諸

部入塞。而卓木布。

舊作阻。今改。

亦叛。連歲用兵。饋餉空乏。泊

諸部平定。

先命瓜爾佳清臣討之。失利。遂以內族襄代將。又命內族宗浩駐泰州。宗浩分兵奮擊。諸

部多降。瓜爾佳清臣。本名阿卜薩。和囉噶路罕都人。宗浩。字師孟。本名老昭祖。四世孫。泰州遼寧。金承安二年。

移州于長春縣。今為蒙古郭爾羅斯旗地。按阿卜薩。舊作阿不沙。和囉噶路罕都。舊作胡里改路桓篤。今並改。

又築濠壘備戍守。議者謂金勢已弱。有勸韓侂胄立不

世勲以自固者。侂胄然之。遂議恢復。聚財募卒。出封椿

庫金萬兩。以待賞功。命吳曦練兵西蜀。既而安豐守臣

厲仲方言。淮北流民咸願歸附。浙東安撫使辛棄疾入

見言金國必亂亡。願屬元老大臣。備兵爲倉卒應變之計。侂冑大喜。鄭挺鄧友龍等。又附和其說。侂冑用師之意益銳矣。

三月。臨安大火。

延及太廟。帝下詔罪已。詔百官陳時政闕失。

夏四月。許及之罷。以張孝伯參知政事。錢象祖同知樞密院事。

時兵端開。韓侂冑欲令及之守金陵。及之辭不行。遂罷。孝伯尋亦罷。以張巖參知政事。

五月。追封岳飛爲鄂王。

先是。賜諡武穆。至是。韓侂冑欲風厲諸將。乃追封飛。

尋封



劉光世為鄜王。贈  
字文虛中少保。

十二月詔宰相兼國用使。

韓侂胄議恢復。陳自强請遵孝宗典故。勅國用司總覈  
內外財賦。遂以自强兼國用使。費士寅。張巖。同知國用  
事。招克民財。州郡騷動。

乙丑開禧元年。金泰和五年。春三月。費士寅罷。士寅于嘉泰三年十月。參知政事。

夏四月。以錢象祖。參知政事。劉德秀。簽書樞密院事。

韓侂胄欲以士寅鎮興元。為宣威之漸。士寅固辭。遂罷。  
以皇甫斌知襄陽府。

尋以斌為七路招撫副使。

竄武學生華岳。字子西。貴池人。于建寧。

岳上書諫朝廷未宜用兵。啟邊釁且乞斬韓侂胄。蘇師

旦周筠以謝天下。侂胄大怒。下岳大理。編管建寧。

五月。金以布隨揆。

本名喇錫。左丞相忠義子。舊作臨喜。今改。

為河南宣撫使。

金主聞南朝將用兵。召諸大臣問之。皆曰。宋敗衄之餘。

自救不暇。恐不敢叛盟。完顏匡

本名蘇蘇。始祖第九世孫也。按蘇蘇舊作撒速。

今改。後仿此。

獨曰。彼置忠義保捷軍。取先世開寶天禧紀元。

豈忘中國者哉。金主然之。乃命平章布薩揆宣撫。會兵

于汴以備之。

揆主汴。移文來責敗盟。三省樞密院答言。邊臣生事。已行貶黜。所置兵亦已抽去。揆

信之。白于金主。時金羣臣皆勸先舉。金主曰。南北和好。四十餘年。民不知兵。不可及聞揆言。遂命罷宣撫使。及

新置兵。事在八月。

秋七月。詔韓侂胄平章軍國事。



從陳白強鄧友龍等請也。命侂胄三日一朝赴都堂治

事。

論者謂侂胄繫銜。此呂夷簡省同字。則其體尤尊。且文彥博省重字。則其所與者廣。于是三省印並納其

第。侂胄置機逆戾于私第。甚者假作御筆。升黜將帥。事關機要。未嘗奏稟。人莫敢言。

以蘇師旦爲安遠節度使。領閤門事。

韓侂胄昵師旦爲腹心。故有是除。

八月。以郭倪知揚州。

尋兼山東京東招撫使。

九月。劉德秀罷。

遣使如金。

韓侂胄欲審金人虛實。故遣陳景俊往賀正旦。景俊還。金主諭之曰。大定初。世宗許宋世爲姪國。朕遵守至今。

豈意爾國屢犯我邊。以此遣大臣宣撫河南。及得爾國  
公移。朕卽罷司。而爾國侵擾益甚。朕惟和好歲久。委曲  
涵容。恐姪宋皇帝。或未詳知。卿歸國當具言之。景俊還。  
以告陳自强。自强戒勿言。由是用兵益決。未幾金使太  
常卿趙之傑  
來賀正旦。入見韓侂冑。故使贊者犯金主父嫌名。以挑  
之。之傑遂倨慢。侂冑請帝還內。著作郎朱質乞斬金使。  
不報。

以邱密爲江淮宣撫使。密辭不拜。

初韓侂冑以北伐之議示密。密曰。中原淪陷且百年。在  
我固不可一日而忘。然兵凶戰危。若首倡非常之舉。兵  
交勝負未可知。則首事之禍。其誰任之。必有誇誕貪進  
之人。攘臂以僥倖萬一。宜亟斥絕。不然必誤國矣。侂冑



不納。至是命密宣撫江淮。密手書切諫曰。金人未必有  
意敗盟。中國當示大體。宜申警軍實。使吾常有勝勢。若  
釁自彼作。我有詞矣。因力辭不拜。侂冑不悅。

御批歷代通鑑輯覽卷之九十

宋

寧宗皇帝

前以史鑑所載金朝人名  
皆譯失真謬妄相傳因命  
詳加釐訂附釋各條分注  
之下以正前訛並於初見  
處批示大旨茲閱蒙古人  
名其舛誤與金史等我朝  
中外一家蒙古諸部久為  
臣僕其語言音義必諷所  
及皆周知又以奇渥溫  
得姓所自必元史傳譌詢  
之喀爾喀親王成袞扎布  
得其所藏蒙古源流一書  
有元事蹟氏族頗具梗概  
始知奇渥溫乃却特之誤  
蓋蒙古書却特與奇渥溫  
字形相似當時宋濂輩承

丙寅開禧二年。金泰和六年。元太祖却特特穆津元年。按元  
南北朝例。但紀其即位首年。至世祖中統元年以後。始每  
年備書。却特舊作奇渥溫。特穆津舊作鐵木真。今並改。  
按元史又以奇渥溫為元室之姓。亦非也。元之國姓。乃  
博爾濟錦氏。却特其貴種耳。此俱以蒙古源流訂正。  
正月。夏李安全夏主乾順之孫弒其主純佑而自立。  
二月。壽慈宮火。  
與純佑從兄弟。

太皇太后移居大內。

二月。以程松為四川宣撫使。吳曦副之。

松移司興元。東軍三萬屬焉。曦進屯河池。西軍六萬屬



修元史既不諳其國語又不辨其字文率憑粗識蒙古字之人妄為音譯遂誤以却特為奇渥溫不啻魯魚之外今既為訂謬且以釋疑實考古之一快因為參稽詳改以正史鑑之誤舉數百年之踳謬悉與辨別闡明以昭一統同文之盛且俾讀史者得免耳食沿襲之陋云

焉。松始至。欲以執政禮見。職責庭參。職聞之。及境而還。松用東西軍一千八百自衛。職抽摘以去。松亦不悟。尋詔職兼陝西河東招撫使。

錢象祖罷。

韓侂胄銳意用兵。象祖執不可。遂以懷姦避事罷之。尋奪二官。信州居住。

夏四月。以薛叔似為京湖宣撫使。鄧友龍為兩淮宣撫使。追奪秦檜王爵。改諡繆醜。

論檜主和誤國之罪也。

後以金和議復成。復檜爵諡。

金復命布薩揆會兵河南。

金聞皇甫斌分兵規取唐鄧。復命揆領行省于汴。河南皆聽節制。盡徵諸道籍兵。分守要害。命彰德守臣護韓

琦墳凡宋宗族所居有司提控之

吳曦反

曦既得志與其從弟晁及徐景望趙富米修之童鎮共  
為反謀陰遣其客姚淮源獻關外階成和鳳四州于金  
求封蜀王

郭倪遣兵復泗州五月下詔伐金

時畢再遇

字德卿兗州人

為先鋒功第一

再遇剋日進兵聞金已備乃先一日出

其不意泗有二城再遇列旗鼓偽為攻西城狀而已率  
精兵逕趨東城先登殺金兵數百遂破之西城亦降倪  
以刺史牙牌授之再遇辭曰甫下二城即得刺史繼此何以為賞不受韓侂胄聞已得泗

州及新息褒信

漢縣故城在今河南光州息縣

赤

隋縣今屬江南潁州府虹縣

唐置宋屬泗州今屬鳳陽府

乃議降詔伐金

有日兵出有名師直為壯言乎遠言乎近孰無

寧宗時事與高宗異高宗南渡之初去靖康覆亡不遠其父兄俱留係金庭使能發憤自強雪國恥而還二帝用兵未嘗無詞且當時亦有韓岳諸將可資恢復之力也寧宗朝所謂老成宿將者為誰且當和議



久成金羣臣咸請先舉而

金主守和約拒而不許

乃無端稱兵召熈苗直賂

然况時書誓表口血未乾

忽欲口復仇頓忘其為

稱臣稱姪之國尚得謂之

有名及援師直為壯以自

解乎

忠義之心為人子為人臣當念祖宗之情直學士院李壁之詞也

郭倪遣兵攻宿州

唐置今屬鳳陽府

大敗

郭倪遣郭倬李汝翼會兵攻宿州敗還至蘄

漢縣宋屬宿州元省

金人追而圍之倬執馬軍司統制田俊邁以與金人乃

得免時建康都統李爽攻壽州亦敗

皇甫斌敗績于唐州

時江州都統王大節攻蔡州亦不克而潰

詔以宗室均

太祖九世孫父希範

為沂王柄

孝宗孫父魏惠獻王愷

嗣賜名貴

和

六月鄧友龍免以邱密為兩淮宣撫使

韓侂胄以師出無功免友龍而以密代之駐揚州密至

鎮部署諸將。悉以三衙江上軍分守江淮要害。于是王大節。李汝翼。皇甫斌。李爽等皆坐貶。斬郭倬于鎮江。秋七月。蘇師旦有罪。安置韶州。

韓侂胄既喪師。始覺爲蘇師旦所誤。一日召李壁飲。酒酣語及師旦始謀事。壁微摘其過以覘之。因極言師旦怙勢招權。使明公負謗。非竄謫此人不足以謝天下。侂胄然之。翌日罷師旦官。籍其家。旬日除名。韶州安置。冬十月。金布薩揆分兵南侵。

布薩揆分兵爲九道南下。揆兵三萬出潁壽。完顏匡兵二萬五千出唐鄧。赫舍哩子仁兵三萬出渦口。赫舍哩呼沙呼一名赫舍哩執兵二萬出清河口。清河卽泗水在淮安府西



少北。水經注。淮水逕清河縣南。與泗水合。謂之清口是也。完顏充按金史列傳。宗幹子名充。卒于天眷九年。此別

是一人。兵一萬。出陳倉。富察貞兵一萬。出成紀。此宋初移

置秦州。州治之成紀縣。明省。完顏綱本名約尼。字正甫。按約尼舊作元奴。

今改。後。兵一萬。出臨潭。舊洮州治。唐置臨潭縣。尋廢。金仿此。仍宋曰洮州。此沿唐舊名。今鞏

昌府洮州衛是。舒穆魯舊作石抹。今改。仲溫本名楞鄂。懿州呼圖克明

圖克舊作胡土。兵五千。出鹽川。注見前。完顏璘兵五千。出

來遠。宋寨。後廢為鎮。在今鞏昌府寧遠縣西南。呼沙呼自清河口渡淮。遂圍

楚州。

十一月。以邱密簽書樞密院事。督視江淮軍馬。

金人攻淮南日急。詔郭杲將兵駐真州以援之。又以密

督視江淮軍馬。或勸密棄廬和州。為守江計。密曰。棄淮

則與敵共長江之險。吾當與淮南俱存亡。乃益增兵防守。

金人破京西州軍。招撫使趙淳焚樊城而遁。

金完顏匡破光化。

宋縣。今屬湖北襄陽府。

棗陽。

隋縣。宋為軍。今屬襄陽府。

江

陵副都統魏友諒突圍奔襄陽。趙淳焚樊城。金人遂破

信陽。

宋置軍。元為州。今屬河南汝寧府。

襄陽隋州。

唐置。今屬湖北德安府。

進圍德

安府。

本漢江夏郡地。宋曰德安府。今隸湖北。

金布薩揆破安豐軍。

宋置。治壽春。今江南壽州是。

遂圍和州。

揆引兵至淮。遣人密測淮水。惟八疊灘可涉。即遣其將

鄂吞。

舊作奧屯。今改後仿此。

襄。

本名添壽。上京路人。

揚兵下蔡。聲言欲渡。守

將何汝勵。姚公佐。以為誠然。悉眾屯花靨。

鎮名。在今壽州西北。



備之。揆乃遣薩布。

始祖弟博郭尼之後。按薩布舊作賽不。博郭尼舊作保活里。今改。後仿此。

等潛師渡八疊灘。駐于南岸。官軍不虞其至。遂皆潰走。

自相蹂踐。死者不可勝計。揆遂奪潁口。

禹貢錐指。潁水由潁上縣東南

流至正陽鎮入淮。謂之潁口。即春秋之潁尾也。

下安豐軍及霍邱縣。

注見前。進圍

和州。整軍列騎。張旗幟于沿江上下。江表大震。

金人入西和州。

本宋長道縣之白石鎮。紹興中移岷州來治。改曰西和。明降為縣。今屬甘肅鞏昌府。

十二月入成州。

西魏置。明降為縣。今屬甘肅階州。

吳曦焚河池。退壁青野

原。

注見前。

曦既遣姚淮源如金。因按兵河池。韓侂胄日夜望其進

兵。使者相繼。曦恐謀泄。乃遣兵攻秦隴。與金人力戰。以

堅侂胄之心。金人許封之。

約曰。若按兵閉境。不為異同。使其師東下。無西顧之憂。則

全蜀之地。卿所素有。當加封冊。一依康王故事。更能順  
流東下。助爲犄角。則旄麾所指。盡以相付。因命完顏綱  
經略之。綱進兵水洛。訪得曦族人吳端。署爲水洛城巡  
檢。使遣人報曦。曦得報意動。以程松在興元。未敢發。詐  
稱杖殺端。而陰遣使送款于綱。及金富察貞破和尚原。入西和州。曦將  
王喜等方力戰。曦忽傳令退保黑谷。軍遂潰。貞入成州。

曦因焚河池。退壁青野原。自是金人無復顧慮。

金人破真州。攻六合。郭倪遣兵救之。敗績。倪棄揚州走。

金赫舍哩子仁破滁州。遂入真州。州之士民奔逃渡江。

者十餘萬。知鎮江府宇文紹節。字挺臣。成都廣都人。亟具舟以濟。

自是淮西縣鎮皆没于金。

金人入大散關。吳曦還興州。

時興州都統制母廣韻注云。母邱。或爲母氏。思以重兵守關。曦聞金



兵至。因撤驀關之戍。金人由板閘谷遶出關後。思孤軍

不能支。遂破曦退屯置口。

在漢中府略陽縣西

完顏綱遣張仔會

之曦言願附金之情。仔請曦告身爲報。曦盡出以付仔。

綱乃以金主命遣馬良顯持詔書金印立曦爲蜀王。曦

密受之。遂還興州。是夜天赤如血。光燭地如晝。翌日曦

召幕屬諭意。謂東南失守。車駕幸四明。今宜從權濟事。

王翼楊駢之抗言曰。如此則相公忠孝八十年門戶。一

朝掃地矣。曦曰。吾意已決。卽遣任辛奉表獻蜀地圖。及

吳氏譜牒于金。

邱岳遣使如金軍議和金布薩揆還軍下蔡。

金布薩揆欲通和罷兵。購得韓琦五世孫元靚。遣之渡

淮。邱宗獲之。詰所以來之故。元覲言兩國交兵。北朝皆謂韓太師意。今相州宗族墳墓皆不可保。故來依太師耳。密使畢其說。始露講解之意。密密使人護送北歸。俾叩其實。既而元覲回。得金行省文字。密以聞于朝。韓侂胄方以師出屢敗。悔其前謀。輸家財二十萬以助軍。而諭密募人持書幣。赴金營議和。密乃遣劉佑持書于揆。願講好息兵。揆曰。稱臣割地。獻首禍之臣。乃可。密復遣王文往言。用兵乃蘇思旦。鄧友龍。皇甫斌等所爲。非朝廷意。今三人皆已貶黜。揆曰。侂胄若無意用兵。師旦等豈敢專權。文還。密復遣使相繼以往。因許還其淮北流移人。及今年歲幣。揆始許之。自和州退屯下蔡。獨濠州



尚使一統軍守之。

薛叔似免。

叔似夙以功業自期。及臨事絕無可稱。屬郡多陷。故坐

免。以吳獵為京湖宣撫使。

以畢再遇權山東京東招撫司。

自金兵渡淮。戍將望風奔潰。惟再遇數與抵禦。朝命再

遇節制淮東軍馬。再遇謂六合最為要害。引兵赴之。適

南門列弩手城上。金兵臨濠。眾弩齊發。伏兵出關。金人

驚遁。既而金赫舍哩都統合兵進攻。城中矢盡。再遇令

人張蓋往來城上。金人意其主兵官也。爭射之。須臾矢

集樓櫓如蝟。獲矢數萬。間出奇兵奮擊。金人始退去。

至是除鎮江都統制兼權山東京東招撫司。又嘗引金

人戰。且前

轉戰未定。焉得有暇煮豆。而且前且却。道路孔長。又安得有如許熟豆布地。况戀棧不前。亦惟驚馬則然。若乘馭者鞭策得宜。亦不虞其盤桓不進。金人既乘勝追逐。又善于馳騁。何至聽馬之自。行自止。且馬正疾。驅可不能聞豆香而駐。足就食。况交戰竟日。馬饑

彼此相同止圖誘撓追騎  
寧不為已馬計乎至於縣  
羊擊鼓更同兒戲此蓋再  
而過於粉飾當時不加深  
察遂從而傳會之宋史之  
不足信大率如此

金人馬死者不可勝計。又嘗與金人對壘。度難與爭鋒。  
一夕拔營去。留旗幟于營。並縛生羊。置其前。二足于鼓  
上。擊鼓有聲。金人不覺為空營。復  
相持數日。及覺。欲追之。則已遠矣。  
程松自興元逃歸。

金完顏綽和

舊作完顏抄合。今改。後仿此。

攻鳳州。松求援于吳曦。曦

給言。當發三千騎往。松信不疑。及曦受金詔。宣言金使

者欲得階成。和鳳。四州以和。持書諷松使去。松不知所

為。會報金兵至。百姓奔走相蹂躪。松亟趨米倉山。

在今漢中

府南鄭縣南。

而遁。自閬州順流至重慶。以書抵曦。句驥

一名玉女山。禮稱曦為蜀王。曦以匣封致餽。松望見大恐。疑為劍。亟

逃奔。使者追與之。乃金寶也。松受而兼程出峽。西向掩

淚曰。吾今始獲保頭顱矣。



蒙古却特穆津稱帝于鄂諾河。

即黑龍江上流發源于喀爾喀部西北之肯特

山舊作幹難一作敖嫩今並改

特穆津之十世祖勃端察爾。

舊作孛端叉兒今改後仿此。

母爲阿掄

郭幹。

蒙古語多美之稱按元史太祖本紀阿掄郭幹嫁

天憲中人化爲金色神人來趨臥榻阿掄郭幹覺遂有

娠產一子即勃端察爾也陳桎通鑑續編阿掄郭幹生

二子寡居夜寢屢有光明照其腹又生三子勃端察爾

其季也今考蒙古源流神人語與元史合而生三子則

同陳說並注于此。

按阿掄郭幹舊作阿蘭勃端察爾

果火托本默爾根舊作脫奔咩哩健今並改

生而狀貌奇異其後子孫蕃衍各自爲部居烏桓之北

與衛拉特

舊作畏羅今改

奈曼九姓回鶻故城和林。

地在今喀爾喀部杭

愛山東元太祖初都此後置和寧路按回鶻即今回回

唐時毘伽可汗築城于哈喇和林河之東其地本與蒙

古接壤自唐末徙居火州回鶻遂散處西域五代宋初

常以玉馬入貢其後又稱回回國王始見于遼史天祚

唐書稱回鶻之先本匈奴  
則似與今蒙古相類又言  
其善騎射喜冠鈔復近厄

管特之習故回詠唐回銅  
器詩序即疑唐史回鶻傳  
或有訛誤將俟餘暇博攷  
茲閱通鑑輯覽因復加考  
訂則回鶻于唐末西徙火  
州後遂蔓延西域五代史  
雖仍稱回鶻而以馬市易  
多資寶玉正與今回部之  
和闐及哈薩克諸處物產  
相合至遼史始有回回之  
名與回鶻並列而元史則  
回回回鶻彼此互稱蓋唐  
以前之回鶻本與蒙古接  
壤故風俗頗似蒙古唐以  
後之回鶻散處今回部之  
地故物產與回部略同若  
夫訖轉為鶻鶻又轉回音  
有緩急故傳譯不同亦猶

紀蓋卽回鶻轉音元史所載回回氏族與回鶻亦無分  
別如昂吉爾傳稱阿哈瑪特回回人而阿哈瑪特傳則  
稱回鶻人實接壤世奉貢于遼金而總隸于韃靼至伊  
非有二族也

蘇克依

勃端察爾九世孫舊作也速該今改

并合諸部勢愈盛大已而生

子有異徵

手握凝血如赤石

將卜名適有名特璊者至其地遂

以特穆津名之

按元史云伊蘇克依攻塔爾部獲其部長特穆津還次特哩衮布達拉山而

生子因卽以命名今依蒙古源流改輯

特哩衮布達拉

依卒

後追諡烈祖神元皇帝

特穆津幼部衆多歸于族人泰楚特

舊作泰赤烏

今改後仿此

部泰楚特合七部人凡三萬攻之特穆津

與母謂楞

舊作月倫今改後仿此

率部人爲十三翼大戰泰楚特

等敗因得少安時泰楚特部地廣民衆而無紀律其下

謀曰特穆津衣人以已衣乘人以已馬真吾主也因悉



畏羅之當為衛拉特乃蠻之當為奈曼也特詳辨之以釋諸史之舛互云

歸之。泰楚特部遂微弱。未幾。塔塔爾部叛金。特穆津自

鄂諾河帥衆會金師同滅之。以功授特穆津為察袞圖

嚕。舊作察兀。禿魯。今改。猶中國之招討使也。特穆津以奈曼部強

盛事之甚謹。奈曼反侵掠之。特穆津乃大會屬部于特

默格。舊作帖麥垓。今改。後仿此。川。在和林。議伐奈曼。奈曼部長迪延

汗。舊作太陽。罕。今改。營于杭愛海。舊作沱。今改。山。在和林北。與默爾奇斯舊作

蔑里乞。今改。諸部合兵。勢頗盛。特穆津與之大戰。擒殺迪延

汗。諸部悉潰。未幾。奈曼遂滅。特穆津益以盛強。遂攻西夏。破拉

吉哩。舊作力吉。里。今改。寨。方輿紀要在。榆林北邊外。經婁斯。舊作落。思。今改。城。與上同。

大掠其人民而還。至是大會諸部長于鄂諾河之源。建

九斿白旗。自號為青吉斯汗。先是金王遣衛王允濟往。靜州。受特穆津之貢。允濟

北伐之謀。覺端在宋。自金八分道大舉。宋無不望風奔潰。邱密受命宣撫。自不得主和。以紓國患。顧侂冑之為元謀。金人久已深悉。請于移書。內暫免繫銜。以冀全飾。一時耳目。金人某。其可欺耶。識見卑鄙。適足貽笑耳。

奇其狀貌。歸言于金主。請以事除之。金主不許。特穆津聞而憾之。靜州。金屬西京路。地里志云。大定中。以大山升置。北至邊八十里。遼史地里志云。本秦州地。當在今郭爾羅斯之境。青吉斯汗。舊作成吉斯。可汗。考蒙古源流云。元太祖未起時。石上有異鳥。向之鳴。聲曰青吉斯。以為瑞。遂取其音為號。今依蒙古源流改正。  
丁卯三年。金泰和七年。春正月。罷邱密。以張巖督視江淮軍馬。

時金已有和意。密上疏。乞移書金帥。以成前議。且言金人既指韓侂冑為元謀。若移書宜暫免繫銜。侂冑大怒。罷密。

吳曦自稱蜀王。權大安軍。

宋置。今陝西漢中府寧羌州是。楊震仲。字華父。成都人。

死之。

曦遣將利吉。引金兵入鳳州。以四郡付之。表鐵山。在漢中府

沔縣為界。即興州為行宮。改元。置百官。遣董鎮至成都。



治宮殿。欲徙居之。稱臣于金。分其所統兵十萬為統帥。

遣祿祈等戍萬州。

唐置今四川夔州府萬縣是。

泛舟下嘉陵江。

即西漢水。

自漢中府略陽縣北與白水江合。又西南合諸水入蜀之廣元界。

聲言約金人夾攻襄

陽。下黃榜于成都。潼川。利州。夔州。四路。以興州為興德

府。召隨軍轉運使安丙。

字君卿。成州人。

為丞相長史。權行都省

事。丙度不得脫。徒死無益。乃陽與而陰圖之。曦又召權

大安軍楊震仲。震仲不屈。飲藥而死。其他如陳咸。

字逢儒。升

卿。子。自髡其髮。史次泰。

眉山

自瞽其目。李道傳。鄧性甫等。

悉棄官去。又有權漢州事劉當可。簡州守李大全。高橋

巡檢郭靖。皆不屈而死。

二月。以楊輔為四川制置使。吳曦逐之。

輔知成都嘗言吳曦必反。帝意輔能誅曦。乃密詔授輔制置使。許以便宜從事。詔至。人勸以倡義。輔自以不習兵事。且內郡無兵可用。遷延不發。曦移輔知遂寧府。輔遂以印授通判韓植。棄成都而去。

以知建康府葉適兼江淮制置使。

適上言三國孫氏嘗以江北守江。自南唐以來始失之。乞兼節制江北諸州。詔從之。時羽檄旁午。而適治事如平時。軍需皆從官給。民以不擾。其防守皆盡法度。

金平章政事布薩揆卒于下蔡。

揆有疾。金主命左丞相完顏宗浩行省事于汴。至是揆卒。揆爲政多惠。人樂爲用。



安丙當職謀逆受其丞相  
長史之命覲顏壯召其視  
楊震仲等之抗詞死節抱  
愧已多及其既至興州則  
又以稱疾臥家坐觀成敗  
使非楊巨源等倡義誅討  
則丙且終為逆黨矣迨巨  
源與好義定約報丙始出  
視事則其庸怯畏縮之狀  
已可概見乃事成之後丙  
遂掠其有功且至殺巨源  
以滅口用心更爲伎刻宋  
人既不能追討其從逆之  
罪而反盡以定蜀之功歸  
之當時刑賞失當總由於  
主暗臣邪耳

四川轉運使安丙誅吳曦傳首臨安

監興州合江倉楊巨源

字子淵其先成都人父信臣家于益昌

謀討曦乃

陰與曦將張林朱邦寧及忠義士朱福等深相結眉州  
程夢錫知之以告轉運使安丙丙時稱疾未視事乃屬  
夢錫以書致巨源延之臥所巨源曰先生而爲逆賊丞  
相長史邪丙號哭曰目前兵將我所知不能奮起必得  
豪傑乃滅此賊巨源曰非先生不足以主此事非巨源  
不足以了此事會興州中軍正將李好義下邳人亦結軍  
士李貴進士楊君玉李坤辰李彪等數十人謀誅曦好  
義曰此事誓死報國救四屬生靈但曦死後若無威望  
者鎮撫恐一變未息一變復生欲奉安丙主事使坤辰

來邀巨源與會。巨源往與約。還報丙。丙大喜。始出視事。君玉與白子申共草密詔。乙亥未明。好義帥其徒七十。四人入僞宮。時僞宮門洞開。好義大呼而入曰。奉朝廷密詔。以安長史爲宣撫。令我誅反賊。敢抗者夷其族。曦衛兵千餘。聞有詔。皆棄挺而走。巨源持詔乘馬。自稱奉使入內戶。曦啟戶欲逸。李貴卽前執之。刃中曦頰。好義急呼王換斧其腰。貴遂斫其首。馳告丙。宣詔。軍民拜舞。聲動天地。持曦首撫定城中。市不易肆。盡收曦黨殺之。衆推丙權四川宣撫使。巨源權叅贊軍事。丙陳曦所以反。及矯制平賊。便宜賞功狀。上疏自劾待罪。函曦首。及違制法物。與曦所受金人詔印。送朝廷。曦僭立凡四十



一日時金遣珠赫呼

舊作木虎今改正後仿此

高琪

西北路明安人

奉冊于

曦未至而曦已誅矣

先是韓侂胄聞曦反大懼與曦書許以茅土之封且召知鎮江宇文

紹節問計紹節云安丙非附逆者必能討賊侂胄乃密

以帛書諭丙云若能圖曦報國以明本心即當不次推

賞書皆未達而誅曦露布已聞朝廷大喜曦首至臨安

獻于廟社梟之市三日詔誅曦妻子家屬徙嶺南奪曦

父挺官爵遷曦祖璘

子孫出蜀存璘廟祀

三月安丙使興州將李好義等復西和階成鳳州及大散關。

楊巨源李好義謂安丙曰曦死敵破膽矣關外四州爲

蜀要害盍乘勢復取之不然必爲後患丙從之于是分

遣好義復西和州張林李簡復成州劉昌國復階州張

翼復鳳州孫忠銳復大散關好義進兵次于獨頭嶺會

忠義及民兵夾擊金人死者蔽路。七日至西和。人人效死。前無留敵。金將完顏欽通去。好義整衆而入。軍民歡呼迎拜。好義籍府庫以歸于官。欲乘勢逕取秦隴。以牽制江淮。宣撫司不許。士氣皆沮。

以楊輔爲四川宣撫使。安丙副之。夏四月。召輔知建康府。吳曦既誅。安丙趣楊輔還成都。詔以輔爲宣撫使。丙副之。兼知興州。許奕字成之。簡州人。爲宣諭使。改興州爲沔州。卽今陝西漢中府畧陽縣。朝廷察丙與輔異。召輔赴闕。輔抵建康。引咎不進。著作佐郎楊簡言。輔嘗棄成都。不當召。遂命輔知建康。

以方信孺字孚若。興化軍人。爲國信所叅議官。如金軍。



韓侂胄募可以報使金師者。近臣薦信孺可使。自蕭山丞召赴都。命以使事。信孺曰。開釁自我。金人設問首謀。當以何辭對之。侂胄矍然。遂以信孺爲奉使金國通謝國信所叅議官。持張巖書以行。

程松以罪竄澧州。

明年再竄賓州。

以錢象祖參知政事。

金人復破大散關。

五月。太皇太后謝氏崩。

諡曰成肅。

李好義襲秦州。與金將珠赫呼高琪戰。敗績。

好義還爲吳曦將。王喜所毒而卒。朝廷慮喜爲變。授節度使。移荆鄂都統制。

六月。安丙殺宣撫司參議官楊巨源。

初吳曦誅。獎諭詔至興州。巨源謂人曰。詔命一字不及巨源。疑有以蔽其功者。俄報王喜授節度使。而巨源與通判心益不平。乃愬功于朝。或謂安丙曰。巨源謀亂。丙令喜鞠其黨。皆抵罪。時巨源方與金人戰于鳳州之長橋而敗。丙密使興元都統制彭輅收巨源械送閬州獄。至大安龍尾灘。因使將校樊世顯殺之。聞者莫不扼腕流涕。

秋七月大旱蝗。

蝗飛蔽天。食浙西豆粟皆盡。詔郡邑賑恤之。

九月。貶方信孺官。遣右司郎中王栴

字汝良。大名。人。如金軍。

信孺至濠州。赫舍哩子仁止之于獄。露刃環守之。絕其



薪水要以五事。信孺曰：反俘歸幣可也。縛送首謀。自古無之。稱藩割地。則非臣子所敢言。子仁怒曰：若不望生還邪？信孺曰：吾將命出國門。已置死生度外矣。子仁遣至汴。見完顏宗浩。出就傳舍。宗浩使將命者來。堅持五說。信孺辨對不少屈。宗浩不能詰。授以報書曰：和與戰。俟再至決之。信孺還。朝廷以林拱辰爲通謝使。與信孺持國書誓草。及許通謝百萬緡。信孺至汴。宗浩怒信孺不曲折建白。遽以誓書來。有誅戮禁錮之語。信孺不爲動。將命者曰：此非犒軍可了。別出事目以示之。信孺曰：歲幣不可再增。故代以通謝錢。今得此求彼。吾有隕首而已。會興州遣師復大散關。宗浩益疑之。乃遣信孺還。

復書于張巖曰。若能稱臣。卽以江淮之間。取中爲界。欲世爲子國。卽盡割大江爲界。且斬元謀姦臣。兩首以獻。及添歲幣五萬兩。正犒師銀一千萬兩。方可議和好。信孺還致其書。韓侂冑問之。信孺言敵所欲者五事。一割兩淮。二增歲幣。三索歸附人。四犒軍銀。五不敢言。侂冑固問之。信孺徐曰。欲得太師頭耳。侂冑大怒。奪信孺三官。臨江軍居住。信孺三使金師。以口舌折之。雖未卽和。然已有成說。及貶。欲再遣使。顧在廷無可者。近臣以王杓薦。乃命假右司郎中。持書北行。

葬成肅皇后。

以趙淳爲江淮制置使。張巖免。



韓侂胄怒金人欲罪首謀。和議遂輟。復銳意用兵。乃以

淳鎮江淮。而免張巖。

巖開督府九月。費耗縣官錢三百七十萬緡。而無成功。

冬十一月。禮部侍郎史彌遠誅韓侂胄于玉津園。詔暴侂胄罪惡于中外。

自興兵以來。蜀口漢淮之民。死于兵戈者。不可勝計。公私之力大絀。而侂胄意猶未已。中外憂懼。禮部侍郎兼資善堂翊善史彌遠入對。因力陳危迫之勢。請誅侂胄以安邦。皇后楊氏素怨侂胄。因使皇子榮王曦具疏。言侂胄再啟兵端。將不利社稷。帝不答。后從旁力贊之。帝猶未許。后請命其兄楊次山。

字仲甫。越之上虞人。

擇羣臣可任者與共圖之。帝始允可。次山遂語彌遠。彌遠得密旨。以錢

侂冑罪惡實盈伏誅已晚然自當明正刑章乃寧宗優柔寡斷謀及后兄引用彌遠諸人施為詭秘以鋤奸之舉幾如盜殺死越三日乃猶豫不信及審察得實始暴其罪于中外惛弱亦已甚矣況除一惡臣亦何功之可論而彌遠等遠因此進秩尤為濫賞紀綱不振若此毋怪一奸去而一奸復來也

象祖嘗諫用兵。忤侂冑。乃先白象祖。象祖許之。象祖以告李壁。彌遠自懷中出御筆批云。韓侂冑久任國柄。輕啟兵端。使南北生靈枉罹凶害。可罷平章軍國事。陳自強。阿附充位。可罷左丞相。日下出國門。仍命主管殿前司公事夏震。以兵三百防護。象祖欲奏審。壁謂事留恐泄。乃已。翌日侂冑入朝。至太廟前。震呵止之。從者皆散。震以兵擁侂冑至玉津園側。殛殺之。彌遠象祖以誅侂冑聞。帝不信。越三日。猶以為未死。後審其果然。遂下詔。暴侂冑罪惡于中外。蓋其謀始于彌遠。而成于皇后及次山。帝初無意也。論功進彌遠為禮部尚書。加震福州觀察使。侂冑專政十四年。宰執侍從臺諫藩閫皆其門庶之人。天子孤立于上。威行宮省。權震宇內。嘗



鑿沼于山下。瞰太廟。出入宮闈無度。孝宗疇昔思政之所。晏然居之。老宮人見之。往往垂涕。顏棣草制。以為得聖之清。易祓撰答詔。以元聖褒之。余嘉請加九錫。趙師異乞置平原郡王府官屬。侂胄皆當之。不辭其嬖妾皆封郡國夫人。每內宴與妃嬪雜坐。恃勢驕倨。掖庭皆惡之。及籍其家。多乘輿御服之飾。其僭紊極矣。易祓字彥祥。潭州人。

治韓侂胄黨。竄陳自强于永州。斬蘇師旦。流郭倪等于嶺南。貶李壁等官。

韓侂胄既死。錢象祖探懷中堂帖授自强曰。有旨。丞相罷政。自强即上馬。顧曰。望大參保全。明日奪其三官。永州居住。尋竄雷州。遣使即韶州誅師旦。安置郭倪于梅州。宋置。明廢。今廣東嘉應州是。鄧友龍于循州。唐置。明廢。今惠州府龍川縣是。郭僕于連州。貶李壁。張巖許及之。葉適薛叔似。皇甫斌等官。

秩有差

立榮王暉爲皇太子。更名壽。

尋更名詢。

十二月。罷山東京東西路招撫司。

以錢象祖爲右丞相兼樞密使。衛涇。雷孝友。參知政事。史彌遠同知樞密院事。林大中簽書院事。

初韓侂胄欲內交于大中。大中不許。而上書極論其姦。因辭官屏居。時事不掛于口。侂胄當國。或勸其通書以免禍。大中曰。福不可求而得。禍可懼而免邪。不聽。凡十二年而復起。

余必欲得侂胄師且之

戊辰嘉定元年。

金泰和八年。

春正月。王柵還自汴。三月。以韓侂胄



首特惡其倡議用兵也在宋人則不當以此惡侂冑夫侂冑之奸罪素著乃宋之罪人非金之罪人也恢復況非其罪卽云用兵之議倡自侂冑寧宗旣從其謀豈可復委咎於下祇冀和議之成不顧事理之非宜胡寅譏之也

蘇師旦首界金

桡至汴請依靖康故事世爲伯姪之國增歲幣爲三十萬犒軍錢三百萬貫蘇師旦等俟和議定後當函首以獻完顏匡具以桡言奏于金主金主命匡移書索韓侂冑首以贖淮南地收犒軍錢爲銀三百萬兩會錢象祖移書金帥府喻以誅侂冑事桡未之知也一日匡問桡曰韓侂冑貴顯幾年矣桡曰已十餘年平章國事才二年耳匡曰今欲去此人可乎桡曰主上英斷去之何難匡顧之而笑和議始決遣桡持書索韓侂冑首以贖淮南桡還言于朝詔百官議吏部尚書樓鑰字大防鄞縣人曰和議重事待此而決姦宄已斃之首又何足惜遂命臨安

府斲棺取首。梟之兩淮。仍諭諸路以函首昇金之事。遂以侂冑及師旦首付王柟送金師。以易淮陝侵地。

### 臨安大火

火凡四日。城內外亘十餘里。死者甚衆。廬舍十燬其七。

百官多僦舟以居。民訛言相驚。亡賴因而縱火爲姦。四年

三月。臨安復大火。焚省部官舍。延及太廟。詔遷神主于壽慈宮。三日火息。乃還太廟。省部皆寓治驛寺。

夏六月。金人歸大散關及濠州。

王柟以韓侂冑蘇師旦首至金。金主御應天門。備黃麾立仗受之。百官上表稱賀。懸二首并畫像于通衢。令百官縱觀。然後漆其首。藏于軍器庫。遂命完顏匡等罷兵。更元帥府爲樞密院。遣使歸大散關及濠州。



秋七月詔邱密同知樞密院事未至卒諡忠定

密儀狀魁傑機神英悟嘗慷慨曰生無以報國死當為

猛將以滅敵其忠義蓋天性也

八月以婁機字彥發嘉興人同知樞密院事樓鑰簽書院事續綱目作

同知院事今依宋史寧宗紀改正

鑰持論堅正忤韓侂冑意奉祠累年機初為太常少卿

侂冑開邊機曰恢復之名非不美今人才難得財力未

裕萬一兵連禍結奈何鄧友龍曰不逐此人則異議無

所回遂斥外及入樞府時干戈甫定信使往來機裨贊

之功為多尤惜名器守法度進退人物直言可否不市

私恩不避嫌疑

賑江淮流民。

出米二十萬石。錢一百萬緡。命江浙制置司賑之。

九月。金遣使來。和議成。

下詔以和議成。諭天下。

冬十月。以錢象祖。史彌遠為左右丞相。雷孝友知樞密院事。樓鑰同知院事。婁機參知政事。

彌遠尋以母憂去位。在十一月。未幾。象祖亦罷。在十二月。

金主璟殂。衛王永濟。

本名允濟。後避諱。改永。世宗第七子。紹王。

金主無子。疎忌宗室。以永濟柔弱。鮮智能。故愛之。欲傳

位焉。會永濟自武定入朝。金主已感疾。遂留不遣。及金

主殂。元妃李氏。黃門李新。喜平章政事。完顏匡等定策。



章宗既選宗室子授以大位自當擇德器才識之優異者代之庶付託得人而邪家攸賴乃心懷疎忌愛及柔弱無能之永濟遽爾與以神器失策若此即不自為計獨不為宗社計乎且內既害及妃嬪外復召怨於夏人見輕於蒙古兵重相尋剛至覆滅章宗不得辭其咎矣

奉永濟即位。明年葬金主璟于道陵。廟號章宗。金章宗陵在順天府房山縣大房山東北。

贈趙汝愚太師沂國公。諡忠定。後追封福王。

己二年。金主永濟大安元年。夏四月金主永濟殺其故主妃李氏。

初章宗遺詔內人有娠者二人生男則立為儲貳。平章

政事布薩端。本名齊勤中都路和爾和必喇明安人。按齊勤舊作七斤和爾和必喇舊作火魯虎

必刺。今改。承金主永濟意奏先帝承御賈氏當以十一後仿此。

月免乳。今已逾期。范氏產期合在正月。今醫稱胎形已

失。願削髮為尼。金主乃以范氏損其遺腹詔中外而殺

元妃李氏。承御賈氏以布薩端為右丞相。

五月起復右丞相史彌遠。

彌遠歸治母喪。太子請賜第行在。令就第持服。以便容

訪

蒙古入靈州。夏主安全降。

夏自是益衰。

秋。八月。罷四川宣撫使。

冬。十二月。輝和爾

舊作畏吾兒。今改。後仿此。

國降于蒙古。

輝和爾國。自唐末。四遷火州。統巴什伯里

舊作別失八里。今改。之

地。臣于契丹。至是。遂舉部降于蒙古。

庚

三年。

金大安二年。

夏。六月。丁巳朔。日食。

續綱目。作四月朔。今依宋史寧宗紀改正。

秋。八月。夏侵金葭州。

夏自天會初與金議和。八十餘年。未嘗交兵。至是。爲蒙

古所攻。求救于金。金主永濟新立。不能出師。夏人怨之。



遂侵葭州。金慶善努

本內族。名承立。字獻甫。統軍使。嗜山之子。按慶善努舊作慶山奴。噶

山舊作拐山。今改。後仿此。敗之而去。

冬十二月。婁機免。

機立朝能正言。好稱獎人才。不遺寸長。訪問賢能。疏列姓名。及其可用之實。以備採取。至是以老罷。

蒙古侵金。

金主永濟嗣立。有詔至蒙古。傳言當拜受。蒙古主問金使曰。新君爲誰。使曰。衛王也。蒙古主遽南面唾曰。我謂中原皇帝。是天上人做。此等庸懦。亦爲之邪。何以拜爲。卽乘馬北去。金使還言。永濟怒。欲俟蒙古入貢。就害之。蒙古主知之。遂與金絕。益嚴兵爲備。數侵掠金西北之

金之始日以和餌宋而用兵如故金所以日彊宋所以日削也蒙古方張之勢亦不過如金之初興其時守禦之方尚勝宣和末政何所畏怯遼爾遣使求和甘蹈宋人覆轍轉受制疆鄰而不悟耶

境其勢漸盛金人皇皇遂禁百姓傳說邊事

周禮曰白北蒙古與

金兵連禍結故特書之

辛未四年金大安三年夏四月金使人求和于蒙古蒙古不許

初金納哈塔邁珠舊作納合買生今改守北鄙知蒙古將侵邊奔

告于金主金主曰彼于我無釁汝何言此邁珠曰近見

其鄰部附從西夏獻女而造箭製楯不休非圖我而何

金主以其擅生邊隙囚之及蒙古侵擾雲中九原連歲

不休遂破大水灤方輿紀要在大同府西北以進金主始恐釋邁珠

而遣西北路招討使鈕祜祿塔達舊作粘合合打今改不和蒙古

主不許

六月遣使如金不至而還



賀生辰也。時金有蒙古之難。不暇延使者。至涿州而還。

尋詔江淮京湖四川制置司。謹飭邊備。

秋八月。夏主安全卒。疾。子遵頊立。遵頊改元光定。號安全曰襄宗。

蒙古攻金西京。留守赫舍哩呼沙呼棄城遁。金西北諸州皆降蒙古。

金通古遷嘉努。舊作獨吉千家。奴。今改。後仿此。完顏和碩。舊作胡沙。今改。後仿此。

至烏沙堡。與下烏月營俱在大同府北。未及設備。蒙古兵奄至。拔烏

沙堡。及烏月營。蒙古主乘勝破白登城。本漢白登臺地。金置縣。元廢。故

城在今大同府陽高縣南。遂攻西京。凡七日。呼沙呼懼。以麾下棄城

突圍遁去。蒙古主以精騎三千馳之。金兵大敗。追至翠

屏口。翠屏山口也。在渾源州南。遂取西京。及桓撫州。桓州金置。明廢。故城在今獨石

口外上駟院牧廠北。撫州亦金置。元為興和路。明廢。故城在今張家口外。鑲黃旗牧廠西南。蒙古主

復遣其子卓齊特。蒙古主長子。舊作木赤。察罕台。蒙古主次子。舊作察合台。諤

格德依。蒙古主第三子。即太宗舊作窩闊台。今並改。後仿此。帥兵分取雲內、東勝

武朔、豐靖等州。注俱見前。由是金德興。本遼奉聖州。金升府。元曰保安州。今州屬

宣化。弘州。遼置。元省。故城在今宣化府西寧縣。昌平、懷來。注俱見前。縉山。唐縣。今宣

化府延。豐潤。金縣。今屬遵化州。密雲。注見前。撫寧。金縣。今屬永平府。集寧。

金縣。屬撫州。元置路于此。明廢。故城在今正黃旗牧廠東。東過平、灤。謂平州灤州也。續綱目作平灤。

正。南至清滄。與下忻代。注俱見前。由臨潢過遼河。西南至忻代。

皆降于蒙古。

閏九月。金兵禦蒙古。敗績于會河。堡名。故址在今宣化府萬全縣西。蒙古

遂入居庸關。大掠而去。



蒙古主既破撫州。休士牧馬。將遂南向。金主復命招討

使完顏糾堅監軍。完顏鄂諾勒

舊作萬奴。今改。後仿此。

等率兵號

四十萬。駐野狐嶺。

在萬全縣東北。勢極高峻。鴈飛過此。遇風輒墮。

以備和碩率

重兵為後繼。或謂糾堅曰。蒙古新破撫州。方以所獲賜

其下。馬牧于野。當乘其不虞。撿擊之。糾堅曰。此危道也。

不若馬步俱進。為計萬全。蒙古主聞之。進兵于獯兒觜。

在野狐嶺西。

糾堅遣麾下明安

剛里人。

問蒙古舉兵之故。明安

反降于蒙古。以虛實告之。蒙古主遂與糾堅等戰。金兵

大敗。人馬蹂躪死者不可勝計。蒙古乘銳而前。和碩畏

其鋒。不敢拒戰。引兵南行。蒙古兵踵擊之。至會河堡。金

兵又大敗。和碩僅以身免。走入宣德。

注見前。

蒙古兵乘勝

薄之。遊兵至居庸關。守將完顏福壽和碩館人棄關遁。蒙古

兵克之。金中都戒嚴。禁男子不得輒出城。蒙古遊奕至

都城下。金主欲南奔汴。會衛卒誓死迎戰。蒙古兵損折

頗多。遂襲金羣牧監。驅其馬而去。金主乃止。命秦州刺

史珠赫呼高琪屯通元門外。尋降和碩為咸平路兵馬

總管。將士以其罰輕。由是益不用命。

冬十一月己酉朔日食。

金以圖克坦鑑為右丞相。赫舍哩呼沙呼為右副元帥。

鑑為上京留守。聞中都戒嚴。曰。事急矣。乃選兵二萬。遣

同知烏克遜鄂吞。舊作烏古孫兀屯。今改後仿此。將之入衛。金主嘉之。

徵拜尚書右丞相。先是。鑑上言曰。自國家與韃靼交兵。以來。彼聚而行。我散而守。以聚攻散。



內徙以避敵鋒自覺境土既示人以弱且不免於辱亡。南人庸懦之見。圖克坦鑑謀國何亦襲此說乎。三州既素號富健。與其內徙曷若併力守禦之。惟東京遠距數千里。誠有鞭長不及馬腹之患。遣大臣鎮衛固是要策。衛紹王始則樂拒之。繼則均悔之。不稍知所審決。史稱其辭智能。卽此可見甚矣。章宗付託之誤也。

其敗必然。不若人保大城。併力備禦。昌和撫三州。素號富貴。人皆健勇。可內徙之。以益兵勢。人畜財貨。不至亡失。參政梁瑄曰。如此是自覺境土也。金主從瑄謀。鎰復奏曰。遼東國家根本。距中都數千里。萬一受兵。州府顧望。必須報可。誤事多矣。可遣大臣行省以鎮之。金主不悅曰。無故置行省。徒搖人心耳。不從。及失三州。又聞東京不守。金主乃大悔曰。從丞相之言。當不至此。我見丞相恥哉。呼沙呼之棄西京而還也。

至蔚州。擅取官庫銀五千兩。及衣幣諸物。奪官民馬。

與從行人入紫荊關。在易州西。地記。太行入。陘其第七爲蒲陰。卽此。殺涑水隋縣

今屬易州。令至中都。金主皆不問。以爲右副元帥。呼沙呼益

無所忌憚。自請兵二萬。北屯宣德。金主與之三千。令屯

媯州。注見前。呼沙呼不悅。

金益都楊安兒作亂。

初。益都人楊安國。少無賴。以弼鞍材爲業。市人呼爲楊

呼沙呼鷹守重寄乃遠  
棄城遁走又擄取官物殺  
縣令罪非一端宜示顯戮  
乃釋而不問更令典兵迫  
至缺望已形惡言上達又  
止放歸田里尋復召用政

鞍兒遂自名楊安兒。泰和中金人南侵。山東無賴往往  
相聚剽掠。命州縣招捕之。安兒時為羣盜。亦請降。隸名  
軍中。累官至防禦使。及蒙古兵薄中都。詔招鐵瓦敢戰  
軍。得千餘人。以唐古哈達舊作唐括合打。今改。後仿此。為都統。安兒  
副之。以戍邊。安兒至鷄鳴山。在今宣化府宣化縣東南。一名鳴鷄山。寰宇記。即古  
磨笄山也。每夜有野鷄羣  
鳴于上。故亦名鳴鷄山。不進。亡歸山東。與張汝楫聚  
黨攻劫州縣。殺掠官吏。山東大擾。

于五年。

金崇慶元年。

春三月。金赫舍哩呼沙呼有罪。放歸田里。

呼沙呼欲移屯南口。移文尚書省曰。韃靼兵來。必不能  
支。一身不足惜。三千兵為可憂。十二關建春萬寧宮且  
不保。金主惡其言。下有司按問。詔數其十五罪。罷歸田



刑不立賞罰無章其致敗  
亡不亦宜乎

里。

夏五月。安南王李龍翰死。其壻陳日昫襲王國事。

龍翰卒。子晃嗣。尋卒。無子。以女昭聖主國事。其壻陳

日昫因襲取之。

李氏自公蘊八傳。凡二百二十餘年而易姓。

金河東陝西大饑。

斗米數千錢。流莩滿野。

金泰安劉二祖作亂。掠淄沂州。

秋七月。雷雨。太廟屋壞。

避正殿。減膳。

權直學士真德秀上疏曰。臣博觀經史所志。自非甚無道之世。未聞震霆之驚。及乎

宗廟者也。蓋震霆者。上天至怒之威。宗廟者。國家至嚴之地。以至怒之威而加諸至嚴之地。其為可畏也明矣。古先哲王。遇非常之變異。則必應之以非常之德政。未嘗僅舉故事而已。今日避殿損膳之令。咸無聞焉。或者

固已妄議陛下務為應天之文而不究其實矣。臣願陛下內揆之一身。外察諸庶政。勉進君德。毋以養安逸為心。博通下情。深求致異召和之本。庶幾善祥日應。咎徵日消矣。真德秀字景元。後更為景希。建之浦城人。

癸酉六年。金至寧元年九月以春二月。故遼人耶律留格。舊作

留哥。今改。取金遼東州郡。自立為遼王。

留格契丹人。仕金為北邊千戶。蒙古兵起。金人疑遼遣

民有他志。留格不自安。遁至龍安。即黃龍府。大定中改隆州。貞祐初升府。

聚眾至十餘萬。自為都元帥。遣使附于蒙古。金遣和碩

率兵往攻留格。大敗之。遂自立為遼王。改元元統。盡有

遼東州郡。遂都咸平。金改為咸州。後升府。明省。留格後故城在今奉天府鐵嶺縣。

降蒙古。蒙古主以為元帥。令居廣寧。

夏五月。夏侵金保安慶陽。



金主永濟復以赫舍哩呼沙呼爲右副元帥。秋八月，呼沙呼弑永濟而立昇王珣。顯宗之子。原名烏都布。是爲金宣宗。金史作吾睹補。今改。自爲太師尚書令都元帥，封澤王。

金主復用呼沙呼，使將兵屯燕城北。圖克坦鎰諫，不聽。

呼沙呼與其黨完顏綽諾舊作醜奴。今改。富察埒爾錦、烏庫哩

道喇

舊作烏古論奪刺。今改。後仿此。

等謀作亂。會金主以蒙古兵在居

庸關，而呼沙呼日務馳獵，不恤軍事，遣使責之。使者至，

呼沙呼怒，妄稱知大興府圖克坦南平謀反，奉詔入討。

使其黨圖克坦金壽召南平。南平不知，行至廣陽門，呼

沙呼遇之于馬上，手刃殺之。完顏錫固納

舊作石古乃。今改。後仿此。

聞亂，召兵五百迎戰，不勝，皆死之。呼沙呼至東華門，護

衛色埒默

舊作斜  
烈今改

和爾

舊作統  
鬼今改

等納之呼沙呼入宮以

其黨易宿衛自稱監國都元帥居大興府陳兵自衛召

聲伎與親黨會飲明日以兵逼金主出居衛邸遣武衛

兵二百固守之

呼沙呼欲除拜其黨令黃門入宮收璽  
尚宮左夫人鄭氏掌璽拒之曰璽天

子所用呼沙呼人臣取將何為黃門曰今天時大變王

上且不保況璽乎御侍當思自脫計鄭氏厲聲罵曰若

輩宮中近侍恩遇尤隆君難不以死報反為逆豎奪璽

邪我死可必璽必不與遂瞑目不語黃門乃還呼沙呼

復遣人奪取宣命之丞相圖克坦鎰時墜馬傷足在告

間難作命駕將入省或告之曰省府皆以軍士守之不

可入矣少頃軍士索人于間巷鎰乃還第呼沙呼欲僭

位猶豫不決以鎰人望乃詣訪之鎰從容謂曰翼王先

封翼王又

章宗之兄顯宗長子衆望所屬元帥決策立

圖克坦鎰既為相遇國家  
大變既不能討賊又不能  
盡節徒以定計策其義  
自免豈得謂忠臣哉



之萬世之功也。呼沙呼默然。乃遣宦者李思中弑金主于邸。時完顏綱將兵十萬。行省事于縉山。呼沙呼誘而殺之。因盡撤沿邊諸軍赴中都。平州騎兵屯薊州。以自重。遣圖克坦銘字國本。貞之孫。等迎昇王珣于彰德。九月。至燕。卽位。立其子守忠爲太子。追廢永濟爲東海郡侯。後追復衛

王諡曰紹。

冬。十月。蒙古大敗金將珠赫呼高琪于懷來。進圍燕。高琪還殺呼沙呼。金主以高琪爲左副元帥。

蒙古兵至懷來。金元帥右監軍珠赫呼高琪拒之。敗績。蒙古乘勝圍中都。方蒙古兵至阜河。欲渡高橋。呼沙呼病足。乘車督戰。蒙古兵大敗。翌日再戰。呼沙呼創甚。不

能出期高琪以乂軍

金史兵志東北路部族乂軍二。西北西南二路乂軍十。又百官志有

密雅里乂等詳袞九處按地卽乂字乂軍。所收之軍也。密雅里舊作咩。今改後仿此。五千拒之高

琪失期不至。呼沙呼欲斬之。金主以其有功。諭令免死。

呼沙呼乃益其兵。令出戰。戒之曰。勝則贖罪。不勝斬汝。

高琪出戰。大潰。自度必爲呼沙呼所殺。乃以乂軍入中

都圍呼沙呼之第。呼沙呼聞難。作登後垣欲走。衣袪墜

而傷股。軍士就斬之。高琪取其首詣闕請罪。金主赦之。

因詔暴呼沙呼之罪。奪其官爵。以高琪爲左副元帥。一

行將士論功行賞。

蒙古以史天倪

字和甫。永清人。爲萬戶屯霸州。

時蒙古穆呼哩

札拉爾氏。崆根郭幹之子。按穆呼哩。舊作木華黎。札拉爾。舊作札刺爾。崆根郭



幹舊作孔溫宿咄。統兵侵金。所向殘破。永清史秉直聚

族謀曰。方今國家喪亂。吾家百口。何以自保。既而知降

者皆得免。乃率里中數千人詣涿州軍門降。穆呼哩欲

用秉直。秉直辭。乃以其子天倪為萬戶。領降人家屬屯

霸州。天倪拊循有方。遠近降者十餘萬家。

十二月。夏取金涇州。

蒙古分兵拔金河北河東諸州郡。

蒙古主留奇爾台。舊作怯台。今改。及哈斯台。舊作哈台。今改。屯燕城北

分降人楊伯遇。劉林。漢軍四十六都統並韃靼兵為三

道。命其子卓齊特。察罕台。諤格德。依循太行而南。破保州。中

抵黃河。山邢洛。滋相。衛輝。懷孟。諸郡。經大掠。平陽。太原之間。別將布扎爾。舊作薄察。今改。等

遵海而東。

破遼。薊。大掠于遼西之地。

蒙古主自將與子圖類

蒙古主少子。後

贈睿宗。舊作拖雷。今改。

出中道

破雄。莫。清。滄。景。獻。河間。瀋。東。濟。南。等郡。

自大口以逼

中都。時中原諸路之兵皆僉往山後防遏。悉僉鄉民爲

兵。上城守禦。蒙古盡驅其家屬來攻。父子兄弟。往往遙

呼相認。由是人無固志。故所至郡邑皆下。凡破金九十

餘郡。兩河山東數千里。人民殺戮幾盡。金帛子女。牛馬

羊畜。皆席卷而去。屋廬焚燬。城郭坵墟。

甲戌七年。

金貞祐二年。

春三月。詔安丙同知樞密院事。未至。改知

潭州。

丙使所愛吏安蕃。何九齡。合官軍夜襲秦州。敗歸。泗州都統制王大才。執九齡等七人斬之。而訟丙于朝。故有



潭州之命。

金以其故主永濟之女歸蒙古。夏四月。及蒙古平。

蒙古主還自山東。屯燕城北。諸將請乘勝破燕。蒙古主不從。遣使諭金主曰。汝山東河北郡縣。悉爲我有。汝所守惟燕京耳。天旣弱汝。我復迫汝于險。天其謂我何。我今還軍。汝不能犒師以弭我諸將之怒邪。金丞相高琪言于金主曰。韃靼人馬疲病。當決一戰。完顏承暉

字離明本

名福興。

曰。不可。我軍身在都城。家屬各居諸路。其心向背

未可知。戰敗必散。苟勝亦思妻子而去。社稷安危。在此一舉。莫如遣使議和。待彼還軍。更爲之計。金主然之。遂遣承暉求和。蒙古主欲得其公主。金主乃以東海郡侯

少女及金帛童男女各五百馬三千與之。蒙古主引歸。出居庸關。收所虜山東兩河少壯男女數十萬。皆殺之。金主以蒙古既和。大赦其國內。

金左丞相圖克坦鎰卒。

金主將遷都于汴。鎰曰。鑾輿一動。北路皆不守矣。今已講和。聚兵積粟。固守京師。策之上也。南京四面受兵。遼東根本之地。依山負海。其險足恃。備禦一面。以爲後圖。策之次也。金主不從。鎰尋卒。鎰明敏方正。學問該貫。一諸名士皆出其門。

五月。金主徙都汴。扈衛軍叛降蒙古。秋。七月。蒙古復圍燕。

金主以國蹙兵弱。財用匱乏。不能守中都。乃議遷于汴。

周東遷而爲春秋七國晉  
南渡而爲南北六朝晉人  
論之詳矣如北魏初極強  
盛至孝文自代遷洛輒棄



本根不久而禍興六鎮馴致亂亡此又往事之龜鑑也爾時金之於蒙古猶前此宋之於金向使宋不南遷何致河北諸地盡為金有前車不遠尤當引以為戒宜察下此之恩而一經

諫者皆不納五月命平章政事都元帥完顏承暉左丞

穆延盡忠

本名搏多上京路明安人按穆延舊作抹撚搏多舊作象多今改後仿此

奉太子

守忠留守中都遂與六官啟行蒙古主聞之怒曰既和

而遷是有疑心而不釋憾特以解和為欸我之計耳復

圖南侵金主至良鄉令護衛乂軍元給鎧馬悉復還官

乂軍皆怨之遂作亂殺其主帥索衮

舊作搜溫今改

而推卓達

舊作札達今改

必什呼勒

舊作筆什爾今改

扎拉喇

舊作查拉爾今改

等三人

為帥叛還北完顏承暉聞變以兵阻盧溝卓達擊敗之

軍勢既張遣使乞降于蒙古蒙古主遂遣明安援卓達

合其兵圍燕京

金主聞之遣人召太子應奉翰林文字完顏蘇呼執不可平章珠赫呼高琪曰

上居此太子宜從且汝能保都城必完乎蘇呼曰完固不敢必但太子在彼則聲勢俱重邊隘有守則都城無

虞昔唐明皇幸蜀。太子實在靈武。蓋將以繫天下之心也。不從。竟召太子。太子既行。中都益懼。素蘭今改。後仿此。按蘇呼舊作

### 罷金歲幣

周禮以宋罷金歲幣為差。強人意。此殊足鄙。當紹興時。宋方與金構怨。宋之君臣不能力圖恢復。以雪仇恥。顧懼金人強盛。視顏饋納。冀速議和。固已甘心臣服。迨大定以後。罷兵修好。交聘已非一日。乃因蒙古侵陵。金勢浸弱。忽爾渝盟。罷幣失已之信。幸人之災。是無恥耳。且是時金不能為宋患。而蒙古之敵方張。不知助隣以禦敵。轉欲抑弱以扶強。號亡虞及理勢。

時金人屢遣使來督歲幣。起居舍人真德秀上疏請絕之。畧曰。女真以韃靼侵陵。徙巢于汴。此吾國之至憂也。蓋韃靼之圖滅女真。猶獵師之志在得鹿。鹿之所在。獵必從之。既能越三關之阻。以攻燕。豈不能絕黃河一帶之水。以趨汴。使韃靼遂能如劉聰。石勒之盜有中原。則疆場相望。便為鄰國。固非我之利也。或如耶律德光之不能即安中土。則奸雄必將投隙而取之。尤非我之福也。今當乘女真之將亡。亟圖自立之策。不可幸女真之未亡。姑為自安之計也。夫用忠賢。修政事。屈羣策。收衆心者。自立之本。訓兵戎。擇將帥。繕城池。飭戍守者。自立之具。以忍恥和戎為福。以息兵忘戰為常。積安邊之金。繪飾行人之玉帛。女真尚存。則用之女真。強敵更生。則施之強敵。此苟安之計也。陛下以自立為規模。則國勢日張。人心日奮。雖強敵驟興。不能為我患。以苟安為志嚮。則國勢日削。人心日偷。雖弱虜僅存。不能無外憂。



必然則宋人所自詡以為  
得計者孰知即其失計之  
甚尊

蓋安危存亡皆所自取。若夫當事變方興之日。而示人以可侮之形。是堂上召兵。戶內延敵也。微臣區區竊所深慮。反覆數千言。帝納之。遂罷金國歲幣。

夏人請會師伐金。不報。

夏人以書來四川。議夾攻金。以恢復故疆。時董居誼字

夫臨川人。初入蜀。不之報。由是虜訊中絕。

九月壬戌朔日食。

蒙古穆呼哩攻金遼西州郡。下之。

穆呼哩進兵攻金北京。守將伊木沁。舊作銀青。今改正。帥眾二

十萬禦于和託。戌名。在今大寧城西。舊作花道。今改。後仿此。敗還。嬰城自守。

其將完顏錫喇。舊作昔烈。今改。後仿此。高德玉等殺伊木沁。推音

達琿。舊作寅答虎。今改。後仿此。為帥。穆呼哩命史天祥。天倪從兄。等趣兵

進攻音達琿逐舉城降。穆呼哩怒其降緩欲坑之。蕭額

森舊作蕭也曰。北京爲遼西重鎮。旣降而坑之。後豈有

降者乎。穆呼哩從之。奏音達琿權北京留守。以烏葉爾

薩勒珠特氏察克察子。按烏葉爾舊作吾也。兒。元史

作吾也。而薩勒珠特舊作珊竹。察克察舊作察噶察

並改。權兵馬帥府事以鎮之。于是金順成懿通州注俱

相繼降于蒙古。

冬十二月金濰州李全北海農家子作亂。

全銳頭蠡目。權譎善下人。弓馬超捷。能運鐵槍。人號李

鐵槍。開禧中咸拱常結之。以復漣水。金主遷汴。賦斂益

橫。河北山東遺民保砦守險。羣聚爲盜。寇掠州郡。皆衣

紅衲襖以相識。時目爲紅襖賊。全與仲兄福亦聚數千。



鈔掠山東。劉慶福國安用。

淄州人。後改名用安。

鄭衍德。田四子洋。

于潭等皆附之。

金張鯨據錦州。自稱臨海王。附于蒙古。

時興中府石天應。

字瑞芝。興中永德人。

亦降蒙古。

鯨尋為穆呼哩所殺。其弟致復

據錦州。自稱瀛王。降金。穆呼哩遣將攻破之。其下縛致出降。遂被殺。

乙未年。

金貞祐三年。

春二月。金布薩安貞。

原名阿哈。舊作阿海。今改。

擊楊安

兒。安兒敗死。三月。安貞復破劉二祖。斬之。

布薩安貞至益都。敗安兒于城東。安兒奔登州。刺史耿

格納之。安兒遂僭號。置官屬。改元天順。眾數十萬。安貞

復與山東行省完顏霆。

本姓李氏。中都寶坻人。

經歷洪郭。

按此係姓氏史

失其

名。將花帽軍討敗之。殲其眾。安兒乘舟入海。欲走。距

嶠山。

在登州府棲霞縣東。方輿紀要。山舊產金。亦名金山。

舟人曲成擊之。安兒墜

水死。無子。其妹四娘子。狡悍善騎射。劉全收餘黨奉之。

稱曰姑姑。衆尚萬餘。掠食至磨旗山。

在萊州府濰縣南。

李全以

其衆附之。楊氏因與私通。遂以爲去。安貞復遣瓜爾佳

錫爾格。

上京路明安人。按瓜爾佳錫爾格。舊作夾谷石里哥。今改。

破劉二祖。斬之餘

黨推霍儀爲帥。彭義斌。石珪。

泰安新泰人。

夏全。時青。

滕陽人。裴

淵。葛平。楊德廣。王顯忠。討焉。

金主遣兵救燕。與蒙古兵遇于霸州。大潰。夏五月。中都留

守右丞相完顏承暉自殺。蒙古遂入燕。

時金中都被圍既久。完顏承暉以穆延盡忠久在軍旅。

悉以兵付之。而自總持大綱。又遣人以礮寫奏告急。金



主命左監軍永錫將中山真定軍。左都監烏庫哩慶壽

河北西路將大名兵萬八千。西南路步騎萬一千。河北

軍一萬。御史中丞李英。字子賢。遼陽人。徙益都。運糧大名。行省富

珠哩。舊作字。今改。德裕。本名富拉塔。隆安路明安人。舊作蒲刺都。今改。調遣繼發。以

救中都。英至大名。得兵數萬。馭衆素無紀律。三月。英被

酒。與蒙古兵遇于霸州北。大敗。盡失所運糧。英死。士卒

殲焉。慶壽永錫軍聞之。皆潰歸。自是中都援絕。內外不

通。承暉與盡忠會議。期同死社稷。盡忠不從。承暉怒。即

起還第。然兵柄既皆屬盡忠。承暉無如之何。乃辭家廟。

作遺表。付尚書省令史師安石。字子安。清安人。本姓尹氏。避國諱。更焉。書

之。皆論國家大計。及平章政事高琪姦狀。且謝不能終

穆延盡忠握重兵以守中都不能誓志嬰城已乖大義且聞留守之議而不從視宮城之燬而不顧忍於給其妃主挈眷奔逃其罪萬無可逭乃敗歸至汴宣宗不繩以棄城失律之條轉復授之相位賞罰倒置尚何以策衆力哉

保都城之罪。從容若平日。與安石舉白引滿。謂之曰。承暉于五經。皆經師授。謹守而力行之。不爲虛文。旣被酒。取筆與安石訣。謂曰。子行矣。安石出門聞哭聲。復還問之。則已仰藥死矣。家人匆匆瘞庭中。是日暮。凡在中都妃嬪。聞盡忠將南奔。皆束裝至通元門。盡忠給之曰。我當先出。與諸妃啟途。諸妃信之。盡忠乃與愛妾及所親者先出城。不復反顧。蒙古兵遂入中都。吏民死者甚衆。宮室爲亂兵所焚。火月餘不滅。時蒙古主在桓州聞燕陷。遣使勞明安等。而輦其府庫之實北去。于是金祖宗神御及諸妃嬪。皆淪沒焉。安石奉承暉遺表至汴。贈尚書令廣平郡王。忠肅。盡忠至汴。金主釋不問。仍以爲平章政事。未幾。以謀逆伏誅。



冬十月夏取金臨洮。

蒙古攻金潼關不克遂自嵩山趨汴金人敗之乃還。

蒙古主駐軍魚兒灤。

在今鑲黃旗牧廠故興和城西金史地理志柔遠縣有大魚灤卽此。

遣僧格巴圖

舊作三哥拔都今改正

帥萬騎自西夏趨京兆以攻

潼關不能下乃由嵩山小路趨汝州遇山礮輒以鐵槍

相鎖連接爲橋以渡遂赴汴京金主急召花帽軍于山

東蒙古兵至杏花營。

在祥符縣西

距汴京二十里花帽軍擊

敗之蒙古兵還至陝州適河水合遂渡而北金人專守

關輔。

時蒙古兵所向皆下金主遣使求和蒙古主欲許之謂薩木哈曰譬如圍塲中獐鹿吾已取之矣獨

餘一免蓋遂舍之薩木哈恥于無功不從遣人謂金主曰若欲議和可去帝號稱臣當封汝爲王議遂不成。

十一月復遣使如金。

列國之事皆當以勝國爲  
殷鑒惟宋則汴京淪喪卽  
屬前車助金滅遼遼甫亡  
而東都之大局盡失茲復  
用元圖金金受患而南渡  
之一綫並亡覆轍相尋沉  
迷不悟徒云恤宗社之恥  
其如宗社並不可保何

賀正旦也。刑部侍郎劉鑰字晦伯。建陽人。等及太學諸生上章  
言其不可不報。

以真德秀爲江東轉運副使。

德秀朝辭奏五事。一曰宗社之恥不可忘。言國家之于金人蓋萬世

必報之讐。高宗孝宗值其方強不得已以太王自處而  
以勾踐望後人。今天亡金近在朝夕誠能以待敵之禮

而遇天下之豪傑以遺敵之費而厲天下之甲兵人心  
奮張士氣自倍何憚而不絕之哉且重于絕之者畏召

怨而啟釁也。然能不召怨于將亡之金而不能不啟釁  
于方興之敵。權其利害孰重孰輕臣願陛下勉勾踐之

良圖懲謝元之失策。二曰比鄰之道不可輕。言韃靼及則王業興隆可冀矣。

苟得志而鄰於吾莫大之憂也。願朝廷毋輕  
二寇。日夜講其攻守之策以逆杜窺窬之心。三曰幸安

之謀不可恃。言今之議者大抵以金之存亡爲我欣戚

幸其必然。是猶以朽壤爲垣而望其能障盜賊也。四曰  
願陛下勵自彊之志。恢立武之經。則大勢舉矣。



導諛之言不可聽。

言今邊事方殷。正君臣戒懼之日。而薦紳大夫工為諛說。或以五福足恃。

為言。夫乾象告愆。邇日尤甚。其可恃讖緯不經之說。而忽昭昭之警戒乎。惟陛下鑒天人之相因。察諛佞之有

害。益修其身以格天休。宗社之慶也。

五曰。至公之論不可忽。

言公論國之元氣也。元氣

瘡。高不可以為人。公論湮鬱。不可以為國。深惟今日。實公論屈伸之機。朝廷之上。若以言者為愛君。為報國。無

猜忌之意。而有聽用之誠。則公論自此愈伸。若以言者為沮事。為微名。無聽用之誠。而有猜忌之意。則公論自

此復屈。夫公論伸屈。乃治亂存亡之所繇分。故臣于終篇。反復極言。惟陛下亮臣愚忠也。

丙子

九年。

金貞祐四年。

春二月甲申朔日食。

東西兩川地大震。

夏四月金以胥鼎

字和之。持國子。

為尚書左丞。行省事于平陽。

鼎知平陽府。聞蒙古兵渡潼關。遣必魯阿魯代圖克坦

拜札。

按必魯阿魯代。舊作必蘭阿魯帶。圖克坦拜札。舊作徒單百家。改。後仿此。

帥兵萬五

千由便道濟河以趨關陝而自以精兵援汴京又遣布

薩薩固珠

舊作僕散掃吾出今改後仿此

帥兵會諸將以拒蒙古之自

關而東者金主以其忠拜鼎左丞遣還平陽

秋七月金郝定稱帝于山東侯摯

字華芝東阿人

討殺之

時摯移行省于東平獲紅襖賊訊之知其渠帥郝定僭

號署官改元己攻陷滕兗單諸州萊蕪新泰等十餘縣

道路不通摯帥師進擊執定送汴京誅之

已而摯遣兵擊劉二祖餘

黨執霍儀斬之其衆皆散

冬十月蒙古克金潼關

蒙古兵次嵩汝間金御史臺言敵兵深入重地近抵西  
郊彼知京師屯宿重兵不復叩城索戰但以遊騎遮絕



道路而別兵攻擊州縣。是亦困京師之漸也。願陛下命陝西兵扼距潼關。選在京勇敢之將十數。各付精兵。隨宜伺察。且戰且守。復諭河北亦以此待之。金主以奏付尚書省。平章珠赫呼高琪曰。臺官不習兵。備禦方畧非所知也。遂止。高琪以蒙古兵日逼。欲以重兵屯駐汴京。以自固。州郡殘破不復恤。金主惑之。國勢益衰。十一月。金帝敗蒙古于平陽。復潼關。

鼎慮蒙古兵扼河。乃檄絳解隰吉孟五州經畧司相與會師。為夾攻之勢。及蒙古自三門析津北渡。至平陽。鼎遣兵拒戰。蒙古兵敗乃去。金人遂復潼關。

金以苗道潤為中都經畧使。

道潤貞祐初。爲河北義軍隊長。以擊羣盜有功。屢遷知  
中山府。至是復有是命。道潤有勇畧。敢戰鬪。能得衆士  
心。前後撫定五十餘城。署保定張柔。字德剛。定興人。爲元帥右  
監軍行元帥府事。

丁丑十年。金興定元年。春正月。金主謀伐夏。不果。

金主命選兵三萬五千人。付圖們和搏。舊作佗滿胡土門。今改。後仿此。

統之西征。尚書左丞胥鼎馳奏。以爲非便。畧曰。自北兵

食不給。兵力未完。若又出師。非獨饋運爲勞。民將流亡。民  
愈至失所。或宋人乘隙而動。復何以制之。此繫國家社  
稷大計。方今事勢止當禦  
備南邊。西征未可議也。遂止。尋進鼎平章政事。封莘  
國公。

地震



二月金尚書省請罷府州學生廩給。金主不許。

尚書省以軍儲不繼。請罷州府學生廩給。金主曰。自古文武並用。向在中都。設學養士。猶未嘗廢。況今日乎。其令仍舊給之。

三月金以武仙

威州人。

同知真定府事。

金石海據真定叛。威州刺史武仙率兵斬海。及其黨二百餘人。降葛仲趙林張立等軍。盡獲海僭擬物。故有是命。

夏四月。金人分道來侵。詔京湖江淮四川制置使趙方

字彥

直衡山人。

李珪

字元暉。吉水人。

童居誼飭兵禦之。

初。金有王世安者。獻取盱眙楚州之策。金主以爲淮南

招撫使遂陰謀南侵。珠赫呼高琪復勸金主侵宋以廣

疆土。金主始猶不然。至是命烏庫哩慶壽完顏薩布

師南侵。遂渡淮。取光州中渡鎮。在光州光山縣淮水旁。執權場官

盛允升殺之。慶壽分兵攻樊城。圍棗陽光化軍。別遣完

顏阿林。本姓郭。以功賜姓。入大散關。以攻西和階成州。朝廷聞

之。詔趙方李珣童居誼俱便宜行事以禦之。先是金右

上疏請遣使與宋議和。則韃靼聞之。亦將斂跡。不宜用

兵以益敵。金主即命古草議和牒文。既成。示參政高汝

礪。汝礪言有哀祈之意。從示微弱。無足取者。議遂寢。平

章攻事胥鼎亦切諫。南侵有六不可。高琪不從。金主以

南北用兵。西夏復擾。財置兵弱為憂。集百官議守禦之

策。高琪心忌之。有所言皆不用。許古字道真。獻州交

河人。高汝礪字巖夫。應州金城人。

五月。趙方遣統制扈再興。字叔起。淮人。鈐轄孟宗政。字德父。絳州人。等。



救棗陽。金人敗走。

金人犯襄陽。棗陽方語其子范。

字武仲。

葵。

字南仲。曰：朝廷和

戰未定。觀此益亂人意。吾策決矣。惟有提兵臨邊決戰。

以報國爾。遂抗疏主戰。因親往襄陽。檄統制扈再興、陳

祥、鈴轄孟宗政等禦之。仍增戍光化、信陽、均州以聯聲

勢。金人來自團山。

在襄陽縣北。

勢如風雨。再興等分三陳設

伏以待。既至。再興中出一陣。復卻。金人逐之。宗政與祥

合左右兩翼掩擊之。金人三面受敵。大敗。血肉枕藉山

谷間。尋報棗陽圍急。宗政午發峴首。遲明抵棗陽。馳突

如神。金人大駭。宵遁。方聞捷。大喜。以宗政權知棗陽軍。

未幾。京湖將王辛、劉世興亦敗金兵于光山。隨州。

昔蜀漢時吳不可謂非讐也然諸葛相後主先修好於吳以與魏敵夫豈忘棄先恥者哉特以與吳競則魏必合吳吳未亡而蜀先微棄怨即好所全者大宋之視金室雖較蜀吳之仇然為深然其勢則不甚相遠宋是時內度國勢既不足以自強外度元兵方當慮其口偏乃不顧輜車之依馴至腹心之潰其禍實由自取趙方雖稱良將而智識不足事昧先幾其能免於悞國之責邪

六月詔伐金。

下詔伐金傳檄招諭中原官吏軍民從趙方之請也。

太白經天。

秋七月丙子朔日食。

冬十二月蒙古以穆呼哩為太師經畧山南。

蒙古主以穆呼哩有佐命之功拜太師國王承制行事。

賜誓券金印分鴻吉哩。

舊作安吉刺今改。

等十軍及番漢諸軍

並隸麾下建行省于燕雲且謂之曰太行之北朕自經

畧太行之南卿其勉之穆呼哩乃自中都南攻遂城及

蠡州。

注俱見前。

皆下之。

初蠡州拒守力屈乃降穆呼哩怒將屠其城時州人趙瑄從穆呼哩為署

百戶泣曰母與兄在城中乞以一身贖一城之命哀懇切至穆呼哩義而許之遂東擊齊定臨淄登萊等州而



夫。

蒙古圍夏興州。夏主遵頊出奔西涼。

戊寅十一年。金興定二年。春正月。李全率眾來降。詔以全為京東

路總管。考李全降宋。宋史寧宗紀。及李全傳。俱在嘉定十一年。續綱目乃書于十年七月。而于分注之末。則

又仍全傳舊文云。東海馬良等輻輳漣水。全等生羨心焉。似尚未歸附者。敘次殊不明晰。今依宋史改書并改輯。

先是知楚州事應純之密奏山東羣盜歸正。中原可復。

李全等出沒島嶼。寶貨山積而不得食。相率食人。會鎮

江武鋒卒沈鐸。亡命山陽。誘致米商。獲利數十倍。知楚

州應純之。饋以玉貨。北人至者輒舍之。鐸因說純之以

歸銅錢為名。弛渡淮之禁。由是來者莫可遏。初楊安兒

未敗。有意歸朝。定遠民季先者。大俠劉佑家。所養也。嘗

隨佑部網客山陽。楊安兒見而悅之。處以軍職。安兒死。

先至山陽。策緣鐸得見純之。道山東豪傑願歸正之意。

純之命先為譏察。諭意羣豪。以鐸為武鋒副將。與高忠

皎各集忠義民兵。分二道伐金。先遂以全五千人附忠

皎。忠皎與合兵。攻克海州。糧援不繼。退屯東海。已而全

及其兄福蒙金苗密青州皆克之。時頻歲小稔朝野無純之見北軍屢捷遂密聞于朝。事丞相史彌遠鑒開禧之事。不明招納密敕江淮制置李珣及純之慰接之。號忠義軍。就聽節制。給忠義糧。于是東海馬良高林宋德珍等萬人輻輳來歸。李全等生羨心焉。至是全至漣水舉衆歸附。遂有是命。

二月金人圍棗陽。孟宗政擊敗之。

宗政權棗陽。初。眡事。一愛僕犯新令。立斬之。軍民股栗。于是築隄積水。修治城堞。簡閱軍士。至是完顏薩布擁步騎圍城。宗政與扈再興合兵角敵。歷三月。大小七十餘戰。宗政身先士卒。金人戰輒敗。忿甚。周城開濠。控兵立濠外。飛鋒鏑以綢鈴自警。鈴響則火吠。宗政厚募壯



士乘間突擊金人不能支。盛兵薄城。宗政隨方力拒。隨

州守許國援師至白水。

此棗陽之白水。即漢光武所興地。非來自南陽之白河也。又別

名滾河。下流入漢。

鼓聲相聞。宗政率諸將出戰。金人奔潰。

金人焚大散關。入皂郊堡。

在秦州西。宋置有皂郊馬務。

三月。利州統制

王逸將兵復之。進攻秦州。至赤谷。

即赤峪川。在秦州南。元統志。皂郊堡下。視赤峪

川。即此。而潰。

金完顏阿林入皂郊堡。兵死者五萬人。逾月。王逸帥官

軍及忠義人十萬復之。追斬金統軍完顏贊。進攻秦州。

至赤谷口。沔州都統劉昌祖命退師。且放散忠義人軍。

遂大潰。

夏四月。金人入西和成。階州。及河池。興元都統吳政敗之。

乃去。

金人合長安鳳翔之衆復攻皂郊。遂趨西和州。劉昌祖焚城遁還。時西和守臣楊克家。成州守臣羅仲甲。階州守臣侯頤。以昌祖遁。皆棄城走。金兵遂入諸州。前後獲糧九萬斛。錢數十萬。軍實不可勝計。復攻大散關。守將王立亦遁。又攻黃牛堡。注見前。吳政拒却之。政至大散關。執立斬之以徇。事聞。政進三官。昌祖奪官。竄韶州。克家等並竄遠州。

五月。金中都經畧副使賈瑀殺苗道潤。道潤將張柔襲之。至紫荊關。遇蒙古與戰。被執。遂降蒙古。

道潤素與瑀有隙。互相攻擊。旣而瑀詐爲約和。道潤信

張柔非奉命不可謂討且其後又降蒙古故正書法曰戮



之。瑀遂伏兵刺殺道潤。道潤之衆無所依。部將靖安民德興府永興縣人。代領之。瑀不自安。遣使告張柔曰。吾得除道

潤。以君不助兵故也。柔怒。叱使者曰。瑀殺吾所事。吾食瑀肉。且未足快意。反以此言相戲邪。遂檄召道潤部曲。告以復讐之意。衆皆羅拜。推柔爲長。柔方會兵趨中山。

而蒙古兵出自紫荆關。柔遇之。遂戰于狼牙嶺。即今狼牙口。在

正定府阜平縣東北。柔馬跌。爲蒙古兵士所執。至軍前。見主帥明

安。柔立而不跪。左右強之。柔叱曰。彼帥我亦帥也。大丈夫死即死。終不偷生爲他人屈。明安壯而釋之。其潰卒

稍來集。明安恐柔爲變。質其二親于燕京。柔歎曰。吾受

國厚恩。不意猖獗至此。顧忠孝不兩立。姑爲二親屈。遂

其王陵歸漢薛包破賊前  
事昭昭苟能自盡其忠實  
亦無虧於孝柔既為金臣  
則當為金盡節何得因一  
時持劫而藉口苟免乎厥  
後領兵內向為敵前驅可  
知其就降不過偷生而全  
孝益為文過耳史稱柔為  
當日名臣顧大節已墮他  
復何論

降。蒙古以柔為河北都元帥。

金國安用降。詔以安用同知孟州事。

秋八月。蒙古穆呼哩復攻取金河東諸州郡。金元帥烏庫

哩德升

本名埒爾錦益都路明安人。

等死之。

穆呼哩圍太原。環之數匝。金元帥烏庫哩德升力拒之。

城西北隅壞。德升聯車塞之。三却三登。矢石如雨。守陴

者不能立。城破。德升至府署。謂其姑及妻曰。吾守此數

年。不幸力窮。乃自縊而死。行省叅政李革。

字君美。河津人。

守平

陽。兵少援絕。城陷。或謂革宜上馬突圍出。革嘆曰。吾不

能保此。何面目見天子。汝輩可去矣。遂自殺。節度使完

顏恩徹痕

隆安府明安人。按恩徹痕舊作訛出虎。今改。後仿此。

守汾州。元帥右監



軍納哈塔富拉塔。大名路明安人。按此又一守潞州。

城破。皆力戰而死。

冬。十二月。金主遣使來求和。不納。遂遣其太子守緒。原名

素。金史作寧甲。速。今改。後仿此。會兵來侵。

金主欲乘勝來議和。以開封府治中呂子羽為詳問使。

至淮中流。不納。廼去。由是和好遂絕。金主以布薩安貞

為左副元帥。輔太子守緒南侵。

己卯十二年。金興定三年。春正月。金人復侵西和。成鳳州。入黃牛

堡。吳政拒戰。死之。

政既死。金人乘勝攻武休關。注見前。都統李貴遁還。權興

元府事。趙希昔棄城走。金人遂入興元府。沔州都統張

威字德遠。成州人。使石宣邀擊之于大安軍。今漢中府沔縣有三泉故城。宋于此

置大安軍。元為州。後改歸明省。大破之。殲其精兵三千人。俘其將巴圖

魯安。舊作巴土。魯。今改。金人乃遁去。

金人復大舉圍棗陽。趙方便知隨州許國等率師攻唐鄧以救之。

完顏鄂和舊作訛可。今改正。帥師圍棗陽。塹其外。繞以土城。方

計其空巢穴而來。若擣其虛。則棗陽之圍自解。乃命國及扈再興引兵三萬餘分二道出攻唐鄧二州。又命其

子范監軍。葵為後殿。

以曾從龍字君錫。公亮四世孫。同知樞密院事。任希夷字伯起。眉州人。徙邵武。

簽書院事。



希夷嘗從朱熹學。篤信力行。爲禮部尙書。以朱熹張栻  
呂祖謙皆已賜諡。而周惇頤程顥程頤張載四人爲百  
代絕學之倡。尙未贈諡。乃上言乞定議賜諡。朝廷從之。  
從龍尋叅知政事。

金人入洋州。竄董居誼于永州。以聶子述爲四川制置使。  
守臣蔡晉卿遣兵拒之。不克。洋州遂破。金人焚其城而  
去。居誼自利州遁還。詔竄之。

夏人請會師伐金。詔許之。

三月。金人侵淮西。知楚州賈涉。字濟川。天台人。使李全救却之。詔

加全廣州觀察使。

金人圍安豐軍。及滁濠光州。遂分兵自光州攻黃州之

麻城。隋縣。今屬湖北黃州府。自濠州攻和州之石磧。在州東北。自盱眙

攻滁州之全椒。來安。南唐縣。今屬滁州。及揚州之天長。真州之

六合。淮南流民渡江避亂。諸城悉閉。金遼騎數百至采

石楊林渡。建康大震。時涉以淮東提刑知楚州。節制京

東忠義。慮忠義人兵為金所用。乃遣陳孝忠向滁州。石

琚。夏全。時青。向濠州。李先。葛平。楊德廣。趨滁濠。李全。李

福。要其歸路。李全進至渦口。與金左都監赫舍哩。要赫

德。一名志。本出親軍。按要赫德舊作牙吾荅。今改。後仿此。駙馬布薩安貞。連戰于

化湖陂。在鳳陽府懷遠縣南。殺金將數人。得其金牌。金人乃解諸

州之圍而去。全追擊之。復敗之于曹家莊。而還。金人自

是不敢窺淮東。初。涉募能殺金太子者。賞節度使。殺親王者。賞承宣使。殺駙馬者。賞觀察使。全



因致所得金牌于涉詭云殺駙馬布薩安貞所獲涉請于朝乞如約受賞遂投全廣州觀察使而安貞實不死也。

興元卒張福等作亂夏四月陷利州聶子述走保劍門福遂掠閬果。

興元軍士張福莫簡作亂以紅巾爲號入利州聶子述退保劍門檄醴泉觀使安丙子知果州癸仲兼節制軍馬任討賊之事癸仲召沔州都統制張威等帥兵來會福等殺總領財賦楊九鼎遂掠閬果州。

復以安丙爲四川宣撫使。

張福等作亂四川大震張方魏了翁

字華父邛州蒲江人

移書宰

執謂安丙不起則賊未卽平蜀未可定雖賊亦曰須安

敵三修城無異臨渴掘井  
本不得謂之善策宣宗詰  
責高琪頗當事理迨工築  
既畢不過繕備之常何功  
足錄乃竟賞以金龜紀以  
穹碑何與前說自相矛盾  
耶

相公作宣撫使事乃定耳。李壁李璣亦以國事勉丙。丙  
乃至果州。會詔丙爲宣撫。知興元府利州路安撫使。民  
心始安。

### 金築汴京裏城。

初。珠赫呼高琪請修南京裏城。金主曰。此役興民滋病  
矣。城雖完固。能獨安乎。高琪固請築之。旣而金主慮擾  
于民。募人能致甍五十萬者。遷一官。百萬陞一等。于是  
平陽判官完顏阿拉舊作阿刺。今改。後仿此。左廂譏察霍定和發

蔡京故居。得二百萬有奇。淮格遷賞。金主一日問曰。人  
言此役恐不能就。高琪曰。苟防城有法。正使兵來。臣等  
愈得効力。金主曰。與其臨城。曷若不令至此爲善。高琪



無以對。及城成，高琪受金鼎之賞，建碑書功于會朝門。  
蒙古張柔侵金，獲賈瑀殺之。金武仙與戰于滿城，敗績，河  
北郡縣多降蒙古。

蒙古使柔帥兵南下，遂克雄、易、保安諸州。柔必欲誅賈

瑀，而瑀據孔山臺。

在定州曲陽縣西北孔山上。志云：山半一孔，前後洞徹，故名。

柔攻

之不下，臺無井泉，汲山下。柔先斷其汲道，瑀窮乃降。柔

縛瑀剖心，以祭苗道潤。遂引兵次于滿城。武仙會鎮定

深冀兵數萬攻之。柔全軍適出，帳下才數百人。柔令老

弱婦女乘城，自率壯士突出，仙兵後毀其攻具。從數騎

策馬杖槊大呼入圍，仙眾皆披靡。復使綠山多張旗幟，

聲言救至。曳柴揚塵，鼓譟以進。仙兵大潰，柔追擊之，尸

陳數十里。柔乘勝攻完州。金置。今爲縣。屬保定府。下之。于是祁陽

金河北西路州縣。無祁陽。當作祁州。曲陽等帥皆降于柔。柔遂圍中山府。

仙遣其將葛鐵槍與柔戰于新樂。飛矢中柔頰。落其二

齒。柔拔矢以戰。葛鐵槍大敗。死者數千人。仙復遣劉成

攻柔。柔又敗之。遂南掠金鼓城。隋縣。明省。故城在深澤

漢縣。今屬保定府。寧晉。唐縣。今屬趙州。諸縣由是深冀以北。鎮定以東。

三十餘城。望風降附。柔之威名震于河朔。

六月。安丙討張福。誅之。

福衆薄。遂寧焚其城。遂入普州。安丙自果州如遂寧。下

令諸軍合圍。絕其樵汲之路。張威兵至。福窮請降。威執

之以獻。丙命轡其黨王才。以祭楊九鼎。而誅福。旣而張



威捕莫簡。及賊衆一千三百餘人誅之。紅巾賊悉平。丙班師還治利州。

孟宗政扈再與合擊金人于棗陽。大敗之。追至鄧州而還。

金帥完顏鄂和擁步騎傳城。

宗政囊糠盛沙以覆樓棚。列甕豬水以隄火。募砲手。

擊之。一砲輒殺數人。金人選精騎二千。號弩手。擁雲梯。

天橋先登。又募鑿銀墳石工。晝夜埒城。連茆葦直抵園。

樓下。欲焚樓。宗政先燬樓。掘深坑。防地道。初戰棚。防城。

隕。穿井才透。卽施毒烟烈火。鼓譟以薰之。金人室以濕。

蘊。析路以列土。城頽樓陷。宗政撤樓益薪。架火山以絕。

其路。列勇士以長鎗勁弩備其衝。距樓陷所數丈。築偃。

月城。翼傳正城。金人摘強兵。披厚鎧。羶衫。鐵面而前。又。

濕蘊濡革。蒙火山。擁雲梯。徑抵西北園樓。登城。城中軍。

以長戈舂其喉。殺之。敢勇軍自下夾攻。金兵墜死燎焰甚衆。

金人連不得志。會扈再。

興。許國兩道並進。掠唐鄧境。焚其城柵糧儲。時金已頓。

兵八十餘日。趙方知其氣已竭。乃召國再興還。併東師。

隸于再興。尅期合戰。再興敗金人于讓河。當作滾河。卽白水。注見前。

又敗之城南。宗政自城中出擊。內外合勢。士氣大振。賈

勇入金營。自晡至三更。殺其衆三萬。金人大潰。鄂和單

騎遁。獲其貲糧器甲。不可勝計。追金人至馬磴寨。在棗陽縣

西北。焚其城。入鄧州而還。金人自是不敢窺襄漢棗陽中

原。遺民來歸以萬數。宗政發廩贍之。給田勸屋與居。籍

其勇壯。號忠順軍。俾出沒唐鄧間。宗政由是威振境外。

秋九月。以賈涉主管淮東制置司。節制京東河北軍馬。

初。山東來歸者日衆。而石珪以計殺沈鐸于漣水。應純

之亦罷去。權楚州梁丙無以贍之。季先乞預借兩月糧。

然後帥所部五千。并馬良等萬人。往密州就食。丙不許。



先請速遣李全代領其衆。丙亦不從。而以石珪權軍務。珪乃奪運糧之舟。渡淮大掠。至楚州南渡門。焚燬幾盡。丙遣人諭之不止。知盱眙軍賈涉上書言忠義之人。源源而來。不立定額。自爲一軍。處之北岸。則安能以有限之財。應無窮之需。飢則噬人。飽則用命。其勢然也。朝廷命涉節制忠義人兵。涉受命。卽遣傅翼諭石珪。楊德廣等。以逆順禍福。珪等乃謝罪。涉慮其人衆思亂。因滁濠之役。分石珪陳孝忠夏全爲兩屯。李全爲五砦。又用陝西義勇法。涅其手。合諸軍。汰者三萬有奇。涅者不滿六萬人。正軍尙屯七萬。使主勝客。朝廷歲省費十三四。至是分江淮爲三司。乃命涉管淮東。

蒙古伐西域諸國。

金張林以山東諸郡附李全來降。詔以林爲京東安撫使。初。蒙古克益都。不守而去。府卒張林與其黨復立府歸金。以功爲治中。林遂據益都。山東諸郡皆附之。林欲歸附以自固而未決。會李全克齊州。比還。揣知林意。乃薄兵青州城下。遣人陳說國家威德。勸林早附。林恐全誘已。猶豫未納。全挺身入城。惟數人從。林乃開門納之。相見甚懽。謂得所託。置酒結爲兄弟。全旣得林要領。附表奉青。莒。密。登。萊。濰。淄。濱。棗。寧海。濟南。十二郡版籍來歸。表辭有云。舉七十城之全。齊。歸三百年之舊主。詔授林武翼大夫。京東安撫使。兼京東總管。



冬十二月。趙方使扈再興許國。孟宗政帥師分道伐金。方以金人屢敗。必將同時並攻。當先發以制之。乃遣再興等帥師六萬。分三道而進。戒之曰。毋深入。毋攻城。第潰其保甲。燬其城砦。空其貲糧而已。

李全襲泗州。不克而還。

時大雨雪。淮水合。全請于賈涉曰。每恨泗州阻水。今如平地。全請取東西城自效。涉許之。全以長鎗三千人從。夜半渡淮。潛向泗之東城。將踏濠水。傳城下。掩金人不備。俄城上荻炬數百齊舉。遙謂全曰。賊李三。汝欲偷城耶。天黑。故以火燭之。全知有備。乃引兵還。

金右丞相珠赫呼高琪以罪伏誅。

高琪自執政。專固權寵。擅作威福。與平章政事高汝礪相倡和。高琪主機務。汝礪掌利權。附已者用。不附者斥。凡言事忤意及負才力。或與已諍諍者。對金主陽稱其才。使幹當于河北。陰置之死地。又以已爲相。不得兼樞密元帥。以攬兵柄。乃與汝礪力勸金主南侵。置河北于意外。凡精兵皆集河南。苟且歲月。不肯輒出一卒。以應方面之急。至是。使奴薩布殺其妻。因歸罪于薩布而殺之。以滅口。事覺。金主久知其姦。遂下高琪于獄。殺之。初。金主將遷汴。欲置虜軍于平州。高琪難之。及發中都。金主戒搏多厚撫虜軍。而搏多輒殺數人。且勸金主取其元給器用。故有卓達之難。而中都以亡。金主嘗嘆曰。壞天下者。高琪。搏多二人也。搏多。卽穆延盡忠。

蒙古攻高麗降之



烏合之衆不足與圖功金  
封王福等九人爲公張時  
泰謂金此舉最爲有識非  
確論也蓋河朔近地不可  
視爲曠原羣盜相雄豈能  
資其屏蔽當日分疆錫土  
計安磐石不久而或敗或  
亡九人中無一能保全境

蒙古兵襲叛人于契丹。經高麗之境。高麗人洪大宣降。  
且爲鄉導。共攻其國。國王噉降。自是交通使命。往來不  
絕。

庚辰十三年。金興定四年。春正月。扈再興許國攻鄧州。皆不克而  
還。

孟宗政敗金人于湖陽。

夏四月。金封經畧使王福等九人爲郡公。分河北山東地  
以隸之。

初。太原爲蒙古所有。河北州縣不能自立。金主詔百官  
議。所以爲長久計。翰林承旨圖克坦高等十六人。請制  
兵有三日戰和守。今欲戰。則兵力不足。欲和。則彼不肯。

土建監功名者其亦何益  
於國哉

唯有守耳。河朔州郡既殘毀。不可一槩守之。宜取願就

遷徙者。屯于河南陝西。不願者。許自推其長。保聚險阻。

宣徽使伊喇光祖

字仲禮。本名巴噶。伊錫部人。按伊喇。舊作移喇。巴噶。舊作八狗。今改。

謂當募土人威望服眾者。假以方面重權。能復一道。即

授以本道總管。能捍州郡。即授以長佐。必能各保一方。

宰臣欲置公府。金主意未決。中丞完顏伯嘉

字輔之。北京路額爾

衮必喇明安人。按額爾衮必喇。舊作訛魯古必刺。今改。後仿此。曰。宋人以虛名致李全。

遂有山東。苟能統眾守土。雖三公何惜。金主曰。他日事

定。公府無乃多乎。伯嘉曰。若事定。以三公就節鎮。何不

可。金主從之。乃封滄州經畧使王福為滄海公。

以清觀。滄州。鹽

山。無棣。樂陵。東光。寧津。吳橋。將陵。阜城。修縣。隸之。

河間招撫使伊喇重嘉努。以戰



功賜姓完顏氏。按伊刺重嘉努。為河間公。以獻。蠶安深州。河間。肅寧。

舊作移刺眾家奴。今改。後仿此。安平。武強。饒陽。六家莊。郎山寨。隸之。真定。經畧使武仙為恒山公。以真定府。沃。冀。

威鎮寧。平定州。抱犢寨。樂城。南宮縣。隸之。中都東路經畧使張甫。賜姓完顏氏。為

高陽公。以雄霸。莫州。高陽。信安。文安。大城。保定。靜海。寶坻。武清。安次縣。隸之。中都西路經

畧使靖安民為易水公。以涿易。安肅。深州。君氏。川。季鹿。三保河。北江。礮山寨。青白口。朝。

天寨。水谷。懽谷。遼州刺史行元帥府事郭文振。字振之。太原人。

東安寨。隸之。平陽招撫使胡天作。字景山。營州人。為平

陽公。以平陽。晉安府。昭義節度使完顏布木凱。本張闡。賜姓。按。

布木凱。舊作。為上黨公。以澤潞。沁州。隸之。山東安撫副使燕寧

伯開。今改。本莒州。為東莒公。以益都府。路皆隸之。九公皆兼宣撫使。總帥本

提控。路兵馬。署置官吏。徵斂賦稅。賞罰號令。得以便宜行之。

除已畫定所管州縣外。如能收復鄰近州縣者。亦聽管

屬同時九府。財富兵強。唯武仙耳。

已而王福降于張林。靖安民為其下所殺。

燕寧與蒙古戰。敗死。胡天作降蒙古。尋秋殺伊喇重嘉。努不能守河間。與張甫同保信安。久之。郭文振亦不能軍。徙居衛州。布木凱部曲離散。為民家所殺。武仙事詳具後。

六月。賈涉誘殺漣水忠義軍副都統季先。其下推石珪為帥以拒涉。

李全自化湖陂之捷。有輕諸將心。以季先威望出已上。陰結賈涉所任吏莫凱。使譖先欲反。涉信之。乃以計命先赴樞密院議事。于道殺之。而遣統制陳選總先眾于漣水。先部曲裴淵。宋德珍。孫武正。王義深。張山。張友。六人拒選不納。而潛迎石珪于盱眙。奉為統帥。珪道楚城。



涉不之覺。遂入漣水。選還。涉恥之。謀分珪軍爲六。請于朝。出修武。京東路鈐轄印誥各六。授淵等以分統先衆。淵等陽從命。而實不奉涉教令。涉恐甚。詔以珪爲漣水忠義軍統轄。

秋七月。金使人如蒙古求和。

金使烏庫哩仲端

本名博濟。字子正。按博濟舊作卜吉。今改。

如蒙古求和呼

蒙古主爲兄。蒙古主不允。

八月。金嚴實

字武叔。長清人。

據青崖峒

卽青崖山。在濟南府長清縣南。巔巒綿亘。崖谷常清。

故名。以魏博等郡來歸。李全遂會張林襲東平。敗績。乃還。

金長清縣令嚴實爲主將所疑。挈家壁于青崖峒。依益都張林以避之。會趙拱以朝命諭京東。過青崖。實因求

內附拱奉實欵至楚州。賈涉以聞。實亦分兵四出。所至  
州縣皆下。于是太行之東。皆受實節制。實乃舉魏博恩  
德懷衛開相等郡來歸。涉因再遣拱往諭。配以兵二千。  
李全亦請往。涉不能止。乃帥楚州及盱眙忠義萬人以  
行。拱說全曰。將軍提兵渡河。不用而歸。非示武也。今乘  
勝取東平可乎。全乃合張林軍得數萬。襲東平之城南。  
金行省呼爾噶咸平府明安人。按呼爾噶舊作胡帥師里綱。又作蒙古綱。今改。後仿此。  
固守。全與林夾汶水續綱目誤作汝水。今改。後仿此。而砦。詰旦金  
監軍王庭玉以騎兵三百奄至。全欣然上馬。帥帳前所  
有騎赴之。殺數人。奪其馬。逐北抵山谷。遇金龍虎上將  
軍鄂博台。按鄂博台舊作幹。不答。今改。後仿此。盛兵以出。旁有繡旗女將。



馳槍突鬪，全幾不免。會諸將赴救，拔全以出，乃退保長清。精銳喪失大半，全恐所攜鎮江軍五百人懷憤，乃使拱先將之以歸，而自以餘衆道滄州，假鹽利慰贍之，尋還楚州。

太子詢卒。

諡曰景獻。

安丙遣兵會夏人伐金。

丙遣夏人書定議同舉，約以夏兵野戰。我帥攻城，遂命利州統制王仕信帥師赴熙秦。鞏鳳翔委丁煇節制，且傳檄招諭陝西五路官吏軍民。

夏取金會州，金遣使如夏議和。

金恒山公武仙以真定降蒙古，穆呼哩以史天倪權知河

金是時雖不及大定以前之盛，使能發憤自強，猶足以自守，何至效果家業惛。

之習動輒議和使蒙古敢於侮慢相加宋人又復依違無據至西夏悖好負德更不應向其下氣輸情徒然示弱而不足以抒患是忘已之先人所以制人者即用人之受制於已之下策而反受制於人不亦大可哀乎

北西路兵馬事。仙副之。

穆呼哩兵至滿城。使蒙古布哈

舊作蒙古不花。今改。將輕騎三千。

出倒馬關。

即古鴻上關。在今保定府唐縣北。

適武仙所遣將葛鐵槍與

之遇。葛鐵槍戰敗。仙遂舉城降。史天倪說穆呼哩曰。今

中原已麤定。而大兵所過。猶縱鈔掠。非王者弔民伐罪

之意。且王為天下除暴。豈可效他軍所為乎。穆呼哩善

之。即下令禁標掠。遣所俘老幼。軍中肅然。

九月。夏人圍金鞏州。官軍會之。不克而還。

夏遣其樞密使甯子寧率眾二十萬圍鞏州。且來趣兵。

王仕信帥師發宕昌。

注見前。

四川宣撫司統制質俊李寔

帥師發下城。

在鞏昌府岷州北。

安丙命諸將分道進兵沔州。

與下



天水。注

並見前。都統張威出天水利州都統程信出長道。鎮名。在鞏

昌府西和

縣西北。與元都統陳立出大散關。統制田昌出子午

谷。金州都統陳昱出上津。

注並見前。

威下令所部諸將毋得

擅進兵。于是諸將遲疑不進。質俊等克來遠鎮。敗金人

于定遠城。

宋置軍。金爲縣。元省。故城在蘭州府金縣。

王仕信克鹽川鎮。

宋置寨。後

改鎮。在鞏昌

府漳縣西北。程信引兵會夏人于鞏州。攻城不克。遂趨

秦州。夏人自定遠退師。信復邀夏人共攻秦州。不從。遂

自伏羌城。

注見前。

引兵還。諸將皆罷兵。信以宣撫司命斬

仕信于西和州。罷威官。

蒙古遣使如金。

蒙古主遣達呼

舊作塔忽。今改。

報金。謂烏庫哩仲端曰。向欲汝

主授我河朔地。彼此罷兵。汝主不從。今念汝遠來。河朔既爲我有。關西數城未下者。則割付我。令汝主爲河南王。勿復違也。

冬十月金以時青爲濟州宣撫使。封滕陽公。

青先爲紅襖賊。及楊安兒劉二祖敗。青承赦降。隸軍中。

爲濟州義軍萬戶。後隨李全來歸。處之龜山。在泗州盱眙縣東北。

寰宇記。禹治淮。獲水神無支祁。鎖之龜山之足。卽此。有衆數萬。至是金元帥赫舍

哩要赫德遣人招之。青以書乞假邳州。以屯老幼。當襲

盱眙。盡定淮南以贖罪。金主乃封青爲滕陽公。本處兵

馬總領元帥。兼宣撫使。而未授以印。

十一月蒙古穆呼哩入濟南。嚴實復以魏博等郡降蒙古。



穆呼哩既戢士卒。州郡悅附。遂以輕騎入濟南。嚴實挈所部三府六州戶三十萬詣軍門降。穆呼哩承制拜實行尚書省事。實將李信乘實出殺其家屬來降。實攻信殺之。復取青崖峒。

金人襲蒙古穆呼哩于濟南。大敗。穆呼哩進圍東平。

時金兵二十萬屯黃陵岡。

在開封府儀封東北。與山東曹縣接界。為河防要害。遣

步卒二萬襲穆呼哩于濟南。穆呼哩迎戰。敗之。遂薄黃

陵岡。金兵陣河南岸。穆呼哩令騎下馬。短兵接。金兵大

敗。溺死者眾。穆呼哩遂進破楚邱。由單州趨東平。圍之。

蒙古耶律楚材

字晉卿。遼東丹王突欲八世孫。履之子。

進庚午元歷。

楚材。貞祐初。為中都行省員外郎。中都破。遂降蒙古。蒙



古主嘗訪遼宗室。召楚材謂之曰。遼金世讐。吾爲汝報之矣。楚材對曰。臣祖父以來。嘗北面事之。旣爲臣子。豈敢復懷二心。讐君父邪。蒙古主重其言。命處左右。備訪問楚材通術數之學。尤邃于太元。時從征西域。以金大明歷不應。製庚午元歷上之。蒙古主每征伐。必令楚材預卜吉凶之兆。亦自灼羊然後行之。

十二月。石珪叛降蒙古。賈涉命李全併將其軍。

石珪以入漣水。非賈涉本意。心懷不安。而李全復請討珪于涉。涉遂以全所統衆。列于楚州之南渡門。而移淮陰戰艦于淮岸。以示珪有備。因命一將招珪軍來者。增錢糧。不至者罷支給。衆心遂散。珪技窮。乃殺裴淵。而挾



孫武正。宋德珍降于蒙古。穆呼哩以珪爲元帥。珪旣去。  
漣水之衆。未有所屬。李全求併將之。涉不能卻。遂以付  
之。

時青自金來附。以爲京東鈐轄。

已而青入泗州西城。金人來救。青敗。乃還。事在明年。







